



REPÚBLICA DEMOCRÁTICA DE TIMOR-LESTE
PRESIDÊNCIA DO CONSELHO DE MINISTROS

PROGRAMA
IV GOVERNU KONSTITUSIONÁL
NIAN

2007-2012

PROGRAMA IV GOVERNU KONSTITUSIONÁL NIAN

Preâmbulu

Introdusaun

Prioriedades ba kurtu prazu.

Liñas Programátikas Governu nian

I. Kreximentu Ekonómiku

1. Agrikultura
2. Peskas no Aquacultura
3. Pekuária
4. Rekursus Naturais
5. Política Enerjética (kona ba eletrisidade)
6. Komérsiu, Indústria, Sektór Privadu no Kooperativas i Servisus (Banka ho seguros).
7. Turizmu

II. Reforma ba Jestaun Estadu

1. Administrasaun Púbilka
2. Organizasaun Administrativa Territóriu nian
3. Finansas Públikas (Osan Estadu)
4. Kombate (funu) hasoru Korrupsaun

III. Kualifikasaun ba Juventude no Dezenvolvimentu Rekursus Umanus Nasionais

1. Edukasaun
2. Formasaun Profisionál no Empregu
3. Arte no Kultura
4. Desportu

IV. Solidariedade, Saúde no Protesaun Sosiál i kombate (funu) hasoru kiak

1. Saúde
2. Kombatentes Libertasaun Nasionál
3. Idozus(katuas, ferik sira) no Feto

V. Infraestruturas no Hadi'a Ema nia Moris

1. Habitasaun (Uma)
2. Obras Públikas
3. Bee, Enerjia no Saneamentu Báziku (buat hotu tenke móos no di'ak)
4. Telekomunikasoens
5. Transportes
6. Meiu Ambiente, Reflorestasaun (kuda fali ai halo matak) no Prevensaun Dezastres Naturais (Rai monu, dalan kotu, tsunami, rai nakdoko nst).

VI. Promosaun ba Igualdade no Tolerânsia (komprende no simu malu) Seguransa Interna no Hametin Demokrasia

1. Paz no Seguransa

2. **Justisa**
3. **Komunikasaun Sosiál.**

VII Defeza Nasionál no Polítika Externa

1. **Defeza Nasionál**
2. **Negósius Estranjeirus**
3. **Kooperasaun Internasionál**

PREÂMBULU (Liafuan Badak)

Depois de governasaun tinan lima liu tiha, durante tempu ida ne'ebé Paíz ida ne'e fó ona pasus balu ba kriaun instituisoens demokrátikas, povu timorenses, hatudu katak nia hakarak mudansa, hodi opta ba projetu polítiku reformadór, no hakarak momo'os hela atu muda nia governantes.

Iha lora 30 Juñu 2007, povu Timór tomak, vota tuir nia konsiênsia, hodi fó apoiu tomak ba partidu haat (4), atu harii Governu estável ida, ho ekipa ida ke forte no prontu atu ukun hamutuk ho Timor-oan tomak i ba duni Timór-oan sira.

Aritmética parlamentar ne'ebé iha, garante ba Governu baze apoiu parlamentár no sosiál ne'ebé metin tebes hodi nune'e, bele asegura governu bele hala'o programasaun no projetu polítiku reformadór ne'ebé bele garante ba Paíz ne'e liuliu ba jersaun abaan-bainrua mai, katak sira bele iha esperansa ba futuru ida ne'ebé respeita malu ho tolerânsia ba malu, bele la'o hamutuk ho dezvoltamentu sosiál no ekonómiku Paíz ne'e nian.

Tanba ne'e, modelu governativu IV Lejislatura ne'e nian forma hosi Governu Aliansa Maioria Parlamentár, ho ema independentes, tanba iha duni hanoin hanesan, hodi nune'e bele garante estabilidade ho governabilidade ba Governu.

Importante liu hotu, mezmuke iha duni maioria parlamentár, Governu ne'e haka'as-an atu ukun hodi halo nafatin diálogu: diálogu ho partidus polítikus; diálogu ho ajentes ekonómikus, diálogu ho sociedade sivíl, ho Igreja, ho ONG sira no asosiasoens seluk tán. Governu hein ema hotu nia partisipasaun konstrutiva ba Timór-Leste nia di'ak.

Programa Governu nian ne'ebé apresenta agora, halibur hamutuk Programas Eleitorais hosi partidus polítikus haat i programa ne'e halo ho partisipasaun hosi ema barak ne'ebé la tama iha partidus, simu kontribuisoens oioin, mai hosi sektores sociedade Timór nian tomak.

Propoen tiha ona ba eleitoradu sira atu hahú siklu polítiku foun ida iha Timór-Leste, ne'ebé hala'o polítika ho Governu tenke tuir étika. Governu ida ne'e estrutura ona halo di'ak atu bele hetan objetivu konkretu reforma nian, ho apoiu hosi kuadru prinsípius no valores sistematizadus ne'ebé bele orienta komportamentu polítiku hodi promove:

- i) Valores direitus sívikus no umanus;
- ii) Valores tolerânsia no respeito;

- iii) Solusaun ba problemas ho dalan dame;
- iv) Prinsípius boa-governasaun, hametin ho mekanizmus ne'ebé forti, efikazes atu kombate korrupsaun, konluiu ho nepotizmu.
- v) Ema hotu nia partisipasaun atu hatán ho efisiênsia ba nesesidades bázikas populasaun nian;
- vi) Prinsípiu fundamentál ida katak ema hotu hakruok ba Lei.

Propoen tiha ona ba eleitoradu sira katak siklu polítiku foun ne'e tenke iha kbiit atu muda no hadi'a Timór-Leste nia moris iha tempu badak no aban-bainrua, liu hosi reformas ne'ebé bele mobiliza timor-oan hotu atu bele hala'o dezvoltimentu nasional, hodi nune'e bele hadi'a populasoens sira nia moris. Governu ida ne'e prontu ona atu kria kondisoens atu desentraliza poder, hode halo divizaun administrativa ba Paiz ne'e , atu nune' prosesu halo desizoens balu bele mos entrega ba governus lokais hodi nune'e povu bele sente katak kbiit atu hola desizoens la'os Na'i Ulun Boot Nasaun sira nian mesak.

Ne'ebé importante tebes prosesu konsulta no envolvimentu parseirus sira hotu, iha Rai laran ho Rai Liur, liuliu iha niveis sektorais, distritais, sub-distritais no komunitarius, atu halo planeamentu atividades no halo akompanimentu i avaliasaun ba politikas dezvoltimentu Paiz ne'e nian.

Governu ida ne'e halo ona kompromisu atu servisu hamutuk ho Orgauns Soberania hotu-hotu, tanba sira ne'e hamutuk ho Governu, maka iha dever no obrigasaun atu hala'o missaun boot atu servi no foti dignidade Povu nian.

INTRODUSAUN

Hamutuk ho kompromisu ba Timór-Leste, Programa IV Governu Konstitusionál ida ne'e nian, uluk nana'in hakarak sai hanesan instrumentu fundamentál ida atu kumpri paktu estabilidade, lealdade, onestidade, solidariedade, firmeza (fiar metin) no respeito malu, ne'ebé partidus hirak hamutuk iha Aliansa Maioria Parlamentar harii metin tiha ona ho Nasaun Timor tomak liu hosi urnas (fatin votasaun), no mos hanesan garantia ba estabilidade nasional, ne'ebé di'ak ba dezvoltimentu ho prosperiedade Timór-Leste nian, paktu ne'ebé halo iha lora 8 Agostu 2007, lora ne'ebé Governu ne'e halo tomada de posse.

Atu hetan fali konfiansa hosi populasoens ba orgauns Estadu nian, tenke liu hosi dinamika kreximentu progressivu ida ne'ebé bele halakon dezempregu ho dizigualdades sociais. Só ho Planu Estratéjiku Dezvoltimentu ekonómiku ida, maka Povu bele hatene no akompania fazes no etapas prosesu Rekonstrusaun Nasional, iha ne'ebé Povu rasik mak sei sai nuudar ator fundamentál.

Tanba ne'e:

- Governu kompromete nia-an atu hala'o **reforma tomak ba Jestaun Estadu** hodi hatoman-an servisu halo di'ak ba bein komun (ema hotu nia di'ak);

- Governu sei **respeita no promove direitos ba liberdade, igualdade sidadaun hotu-hotu nian, promove mós valores direitos sívikus no umanus kona-ba tolerânsia no respeito malu iha perspectiva ba sidadania ida** ke loloos nian i iha sintonia/armonia ho Estado de Direitu Demokrátiku;
- Hamutuk ho **kombate ba pobreza (kiak),liu hosi dezentvolvimentu sosiál ekonómiku**, programa ida ne'e, halo kle'an liu no kontinua tan esforsu realasiona ho **konsolidasaun ba unidade nasional, paz, demokrasia; hametin espíritu autu-estima sidadauns hotu-hotu nian; combate ba korrupsaun, konluiu no nepotizmu; reforsu ba soberania nasional no kooperasaun internasionál;**
- **Agrikultura** hanesan sektór fundamentál ba aktividade ekonómika no sosiál Timór-Leste nian, i iha importânsia partikulár ba produsaun ai-han no ba empregu i buat seluk ne'ebé bele ajuda hadi'a populasoens sira nia moris. Nia papél iha seguransa alimentár buat ida ke ita labele haksesuk. Governu sei orienta nia intervensaun iha sektór ida ne'e iha kuadru polítika dezentvolvimentu rejional, konservasaun ambientál (kuida no bali di'ak buat hotu ne'ebé hale'u ita) no halo planu estratéjiku ba dezentvolvimentu ne'ebé asegura produtividade no sustentabilidade.
- **Kona-ba atividades peskeiras no pekuárias**, Governu nia objetivu fundamentál mak maximizasaun (halo barak no aas liután) benefísius ekonómikus no sosiais ne'ebé mai hosi sektores importantes hirak ne'e ba vida nasional.
- Iha fali agrikultura ka, iha peskas no pekuária, Governu sei tau matan nafatin ba objetivus espesífikus seluk tan, hanesan kontribui atu hadi'a níveis seguransa, qualidade no reserva ba ai-hán populasoens nian; kontribui ba ekilíbriu no balansa pagamentus hodi loke tán empregu (servisu).
- Governu ida ne'e la simu filozofia ne'ebé dehan katak “ Paíz kiak, Povu mós kiak, maibé loko-an tanba iha osan barak, rai metin hela iha bankus Paízes riku sira nian”. Tanba ne'e, Governu ida ne'e hakarak uza **riku-soin hanesan rekursus naturais no minerais** halo didi'ak, katak kontroladu no efisiente atu hadi'a populasoens tomak nia kondisoens moris, hodi investe iha konstrusaun nasional.

Só ho Planu Estratéjiku Dezentvolvimentu Nasionál ida, maka bele orienta utilizasaun kontrolada no efisiente ba reseitas/osan ne'ebé mai hosi rekursus hirak ne'e i bele mós garante planu ida ke seguru, atu halo investimentu hodi buka tan reseitas foun. Ba ida ne'e, fundamentál tebes, katak presiza transparênsia iha jestaun ba prosesu ida ne'e i transparênsia só bele iha, karik asuntu kona-ba rekursus naturais labele iha mesak de'it ukun-na'in no polítikus sira nia poder/liman.

Atu implementa sistema naun-partidarizmu iha sektór ida ne'e, tenke hanesan mós prioriedade ida, ba organizmus ne'ebé servisu iha sektór ida ne'e, no mós ba mekanismus kontrolu nian, ne'ebé tenke obedese ba kritérius kona-ba koñesimentu

tékniku no profisionál. Hosi parte seluk, importante atu avalia fali utilizaun reseitas, hodi define kritérius ne'ebé loloos nian ba investimentu hodi bele multiplika(halo barak tan) reseitas, i tau mós sistema ida ke kona lós ba realidade iha timór, hodi poupa fundus ne'ebé iha.

- Vizaun jerál Governu ne'e nian ba dezvoltimentu **polítika enerjética**, fundamental iha prinsípius katak presiza garante seguransa iha abastesimentu(aprovizionamentu) nasional no halo abastesimentu ba populasaun tomak iha Timór-Leste, ba konsumu doméstiku (rasik) no mós konsumu industriál.

Energia buat ida ke fundamentál ba dezvoltimentu sustentável (dura kleur) Paíz ne'e nian. Governu sei dudu kompetitividade nasional, halo timór-oan sira hanesan parte ativa iha prosesu ne'e laran, asegura dezvoltimentu sustentável ho aproveita fontes enerjéticas hotu-hotu ne'ebé iha; lori haka'as liu tán explorasau rekursus renováveis i bainhira foin hahú protesau ambientál.

- Governu aposta tiha ona atu halo lejislatura ida ne'e hanesan era/tempu ba **dezovertimentu ekonómiku hametin ho padraun kreximentu sustentadu**, ne'ebé Nasaun Timor iha duni direitu i ba ema hotu nia bein-estar (moris di'ak).

Política ekonómika ne'ebé Governu hakarak implementa mak atu tau liu matan ba **timor-oan hotu nia kondisoens moris no objetivu atu hadi'a duni kondisoens hirak ne'e**. Ita nia Paíz kiak i mais de metade populasaun timor nian mak moris kiak, liuliu iha foho ka fatin ne'ebé dook.

Timór-Leste kontinua hanesan Paíz ida hosi 20 Paízes ne'ebé kiak liu iha mundu, mais de metade populasaun moris ho menusde USD\$1 laron ida, ne'e hanesan indikadór kiak. Maisde metade populasaun moris iha situasaun ida laiha seguransa, tanba hamlaha, no iha de'it 30% rai hodi halo agrikultura, no kuda sasán uitoan kombina ho hakiak gadu / animal

Presiza **luta maka'as hasoru kiak**, liu hosi kreximentu ekonómiku tamba investimentus públikus, bele mos tamba investimentus iha sektór privadu aumenta, ai-hán mós barak, hanesan konsekuênsia hosi produtividade no diversidade agríkola.

Rekursus públikus tenke uza hanesan funsau ba políticas kona-ba ema kiak sira no hakiak rede seguransa sosiál ida ba grupus ne'ebé vulneráveis (fraku liu), nune'e mós halo prevensau ba emergênsias relasiona ho krize umanitária, tanba ne'e prioriedade ida hotu.

- Preokupasaun boot ida hotu maka atu **garante redusaun (hamenus) dezigualdades sociais no promove inkluzau dezempregadus (ema la iha servisu) sira iha tesidu produtivu nasional**. Hirak ne'e maka hanesan fatores esensiais/importantes ba kreximentu ekonomia nian i tanba ne'e, hodi

bele hasa'e aas liután nívél bein-estár timor-oan sira hotu nian atu luta hasoru ekskluzauñ sosiál.

- Governu entende katak **sektór privadu** maka nuudár parseiru fundamentál iha dezvoltimentu nasional, tanba bele buka rasik rikeza (riku-soin) no loke empregu, la depende ba atividades empregu Estadu nian. Sektor privadu nasional sei hetan apoiu hosi Estadu, maibé tenke halo tuir kriteirus kona-ba kompetênsia, projetu nia valór (folin), onestidade profisional no kapasidade téknika, hodi kombat klientilizmus polítikus (buka de'it partidu maluk) ne'ebé estraga fali prosesu konstrusaun Paíz no kapasitasaun ba emprezariadu nasional.

Sei promove mós **kriasaun emprezas kiik no natón**, hodi fó valór ba produsus nasionais no insentiva atividades produtivas, atu nune'e bele kria tan empregu iha populasaens sira nia leet.

Governu sei haree di'ak fali política investimentu atu fomenta (dudu/haburas) **investimentu externu**, hodi bele sai hanesan motór ba dezvoltimentu no loke empregu ba jovens sira, tanba ne'e, presiza kria klima paz ho tolerânsia atu Timór-Leste bele sa'i hanesan fatin di'ak ida hodi atrai (dada) turistas sira hosi Estranjeiru.

- **Governu define kriasaun empregu hanesan objetivu prioritáriu ida**, liuliu atu fó servisu ba jovens timor-oan sira, tanba dala barak sira mós responsáveis ba instabilidade iha Paíz ne'e. Sei prepara iha tempu badak medidas políticas, programas no projetus ekonómikus imediatos (lailais nian), atu aselera postus traballu no hetan rendimentu. Hosi ângulu(sikun) ida ne'e mós, **formasaun profisional merese liu esforsu i sei haree tuir perspectiva transversál ba sektores atividade hotu-hotu**.
- Governu sei haka'as-an ba **dezoñvimentu turizmu ida ke** estruturadu ne'ebé: sei hala'o tuir dezvoltimentu turizmu ne'ebé sustentável no responsável, liu hosi planeamentu, koordenasaun no armonizasaun políticas transversais (multisektoriais), hodi labele haluha katak presiza kompatibiliza (hala'o hamutuk no hanesan) prezervasaun ambiente, jestaun rekursus naturais no ordenamentu território.
- Iha kadru **boa governasaun**, Governu sei reforma no moderniza Administrasaun Públika hanesan: tau loloos nia nafatin iha parâmetrus legalidade nian no ba interese komun (ema hotu nian); racionaliza utilizasaun beins no rekursus públikus; rehabilita (hadi'a) imajen (ilas) no papel (knaar) servisu públiku nian, hodi implementa mekanizmus rigór no kontrolu ne'ebé forti; promove mós kriteirus kona-ba imparcialidade no méritu iha dezvoltimentu no estabilidades profisionais ba funsionárius públikus sira, ne'ebé tenke aselera revizaun ba lejislasaun referente ba rejime karreira.

- Atensaun ida tan iha lejislatura ida ne'e, maka Governu tenke hanoin mós **atu hametin poder lokál**. Tenke simu partisipasaun desentralizada hanesan kondisaun indispensável (importante) ba ezersísiu sidadania, tanba ne'e, tuir kbiit nasionál ne'ebé iha, sei fó ba Podér Lokál, ne'ebé sei servisu metin no hamutuk ho Podér Tradisionál, meius no rekursus ne'ebé sira presiza atu hala'o knaar no kompetênsias ne'ebé sira simu.

Tanba ne'e Governu sei define polítika desentralizasaun no aselera produsaun lejislasaun ne'ebé presiza, relativa ho poder lokál.

- **Finansas Públikas** hanesan kondisaun importante ba dezvoltimentu ekonómiku tanba-ne'e, jestaun ida ho transparênsia, rigór no verdade, fundamentál tebes relasiona ho kontas públikas, hodi asegura ekonomia kompetitiva ida, no mós kredibilidade ba Estadu, iha nível nasionál ho internasionál.
- Governu hili **Edukasaun** hanesan investimentu ba futuru Paíz ne'e nian, tanba ne'e sei destaka/haree liu ba áreas prioritárias atu halo intervensaun, liu hosi planu asaun ida ne'ebé orienta ba reforma sistema ensinu

Governu fiar katak rekursus umanus hanesan motór dezvoltimentu sosiu-ekonómiku Paíz ne'e nian, tanba ne'e presiza jera/kria kualifikasoens ne'ebé di'ak nian iha merkadu traballu iha Timór-Leste.

Imperativu nasionál ida mós ba Governu maka tenke harii sistema ensinu ida ne'ebé sustentável haree hosi aspetu finanseiru, ho qualidade no bele hatán ba nesesidades dezvoltimentu Timór-Leste nian.

Nune'e sei implementa medidas ba jeneralizasaun (habelar/habarak) ensinu ho qualidade, atu bele halo promosaun ba ensinu primáriu gratuitu, alargamentu/aumentu ba ensinu tékniku-profisionál, dignifikasaun profisionál dosentes sira, no kriaun koerênsia ba ensinu tékniku no implementasaun politika rigoroza i transparente kona-ba bolsas de estudo, atu hasa'e kapasidade intelektuál jersaun foun nian.

- Iha lejislatura ida ne'e, salienta mós nesesidade atu halo aposta maka'as **ba preparasaun no valorizasaun rekursus umanus nasionais**, tuir perspetiva transversál ba setores atividade hotu-hotu iha Paíz ne'e. Aposta ida ne'e só bele efetiva (la'o di'ak) karik iha investimentu desizivu (boot) iha edukasaun no formasaun tékniku-profisionál.
- Governu sei dispensa (fó) atensaun tomak ba **kultura**, haree ba nia importânsia boot atu harii identidade nasionál no haburas espíritu de pertensa ba Nasaun (sente katak Nasaun ne'e ita nian rasik, ida-idak nian).

Iha kontextu ida ne'e importante halo definisaun ba Polítika Kulturál koerente no efikaz no definisaun ba modelus jestaun iha Planu Nasionál Jestaun ba Patrimóniu

Kulturál Timór-Leste , atu serve hanesan intermediu entre vertentes oioin kona-ba jestaun patrimóniu kulturál (hanesan iha nível lejislativu, edukativu, kulturál no sientífiku)

- Governu mós sei haka'as-an metin atu halo reforma iha **sektór saúde**, ho objetivu bele hetan buat barak iha domíniu (parte) ida ne'e, tanba fundamentál tebes ba populasaun nia qualidade moris, aposta mós iha sistema preventivu ba moras no iha edukasaun sanitária no alimentár, ne'ebé krusiál liu iha áreas (fatin) Paíz nian hirak ne'ebé dook (iha foho).
- Governu sei hala'o **polítikas sosiais**, tanba Estadu nia obrigasaun maka atu salvaguarda/defende bein-estár populasoens tomak nian.

Tuir medida ida ne'e, sistema seguransa sosiál sei sai hanesan mós prioriedade ida. Servisus sosiais Estadu nian tenke efektivus i kapasitadus (iha kbiit) atu oferese programas lubun ida ba populasaun ne'ebé preziza liu ajuda hodi halo dezvoltamentu no promosaun ba dignidade umana.

Pagamentu pensoens ba **combatentes libertasaun nasional no ba sira nia erdeirus lejítimus** (sira ne'ebé iha direitu atu simu sira nia pensoens) hanesan mós imperativu (buat ida ke urjenti), tanba aleinde kestaun morál hanesan mós obrigasaun legál.

Nune'e mós ba **katuas, ferik no feto faluk sira** ne'ebé kontribui tiha ona ba libertasaun Nasaun, sei halo projetus konkretus atu hodi bele aseguara protesau ba sira.

- **Juventude (ema klosan) no feto sira**, sei tama mós hanesan prioridades Governu nian relasiona ho polítikas sosiais. Tanba ne'e, sei implementa polítikas spesífikas (ketak nian) iha domínios/kampu empregu, edukasaun no desportu, iha formasaun profisionál no fomentu emperezariál bá lós de'it jovens ho feto sira.

Governu ida ne'e sei define política konsertada ba feto sira, i asenta iha abordajen integrada kona-ba jêneru, iha promosaun kulturál, ba estabelesimentu pontus fokais iha distritus no mós iha kombate ba analfabetizmu ba feto sira.

Kona nafatin ba feto sira, Governu sei kria mekanizmus hodi enkoraja sira nia partisipasaun iha atividades polítikas ne'ebé bele hatuun tiha nível violênsia doméstika kontra sira.

- Governu sei foti mós hanesan prioriedade ida maka atu hadi'a qualidade vida (moris) Timór-oan tomak nian, tuir forma sustentada, liu hosi asoens polítikas hodi hadi'a **infra-estruturas** ne'ebé iha ona no kria tan foun balu, tanba importante tebes ba dezvoltamentu sektores atividade hotu-hotu nian hanesan tuir mai ne'e: abitasaun, obras públikas, transportes no vias komunikasaun, telekomunikasoens, bee, eletrisidade no saneamentu báziku iha Paíz tomak laran.

Fiar katak infra-estruturas mós hetan fatin relevante iha kuadru dezvoltimentu sustentadu Paíz ne'e nian, maka Governu hanoin katak determinante/importante tebes halo adopsaun programa investimentu nian ida no modernizasaun ne'ebé abranje (kona mós ba) espektru tomak infras-estruturas nian.

- Tuir perspetiva Governu nian, dezvoltimentu sustentadu ne'ebé hakarak defende, implika (kait mós) **ho política ekonómika no sosiál ne'ebé respeita ambiente**, liuliu hodi haka'as-an hala'o utilizasaun prudente (la arbiru) no rasionál ba rekursus naturais no labele haluha responsabilidades ba **jerasoens vindouras(futuro nian)**.
- Sei aumenta tán **operasionalidade no efikásia ba PNTL**, atu bele garante orden públika. **Seguransa ba ema no sasán no estabilidade sosiál** okupa mós fatin relevante iha dezvoltimentu Paíz i ba populasaons sira nia kualidade moris, hodi la haluha efektu psikolójiku favorável ne'ebé sira provoka ba potenciais investidores nasionais ho estranjeirus. Kona-ba ida ne'e Governu haka'as-an atu defende **dignifikasaun instituisaun polisiál nian**, tanba ne'e sei halo revizaun ba nia estrutura no implantaun territoriál, hodi introduz (hatama) mekanismus, prosedimentus no formas atuasaun ne'ebé bele haree bainhira sira halo aproximaun halo di'ak ba populasaons, hodi servi nafatin no didi'ak ba sira.

Nune'e mós, Governu sei dedika (fó) atensaun tomak ba **formasaun tékniku-profisionál ba ajentes PNTL nian sira**, hanesan kondisaun esensíal, atu nune'e, wainhira hakarak hetan/atinje fins, tenke observa/respeita nafatin prinsípius konstitusionais no respeita eskrupulozamente (ho kuidadu/ta'uk tebes) direitús fundamentais sidadauns sira nian.

- Governu atu introduz (halo) mudansas iha sektór **Justisa**, tanba ne'e hanesan fin esensíal ida hotu ba Estadu, i tanba nia funsaun importante. Promove mós kultura justisa ida ne'ebé kredível, independente no imparsiál.

Governu entende katak Justisa depende ba demokrasia, dezvoltimentu no bein-estár populasaons nian, tanba razaun ida ne'e Justisa tenke reorganiza fali, ne'e signifika katak tenke foti primadu legalidade no respeitu ba garantias hanesan trave-mestra (Ai riin boot) política judisiária nian. Nune'e, sei dignifika majistratura no salvaguarda independênsia juízes sira nian.

Tribunál sira iha kompetênsia atu administra justisa hodi povu nia naran, tanba ne'e sei fó importânsia ba órgaun ida ne'e, no fó mós rekursus umanus ne'ebé natón nian i kompetentes, fó rekursus materiais, ne'ebé fundamentais atu hala'o didi'ak sira nia misaun.

Atu justisa bele impere(manda) i atu bele luta hasoru impunidade, tenke halo restruturasaun profunda (kle'an) ba **prizoens**. Presiza recupera edifísius prizonais ne'ebé iha no rekualifikasaun ba servisus hotu-hotu, hodi harii mós prizoens foun atu hamutuk ho aplikasaun justisa bele foti dignidade ema sira ne'ebé simu responsabilidade ba crimes ne'ebé sira halo.

Prokuradoria Jerál da Repúblika sei estrutura, fó rekursus umanus no materiais atu bele presta asesoria kualifikada ba Estadu, hodi nune'e bele permite (husik) Administrasaun Públika hala'o loloos nia knaar i orienta ho kritérius legalidade nian.

- Governu sei konsede (fó) atensau partikulár ba **Sektór Komunikasaun Sosiál**, tuir konstituisaun, ne'ebé sei kria lejislasaun ida ke enkuadra (hatama) sektór ne'e, garante kondisoens ne'ebé presiza atu asegura liberdade, independênsia ba meius komunikasaun sosiál, tuir perspetiva kualidade, seriedade no rigór, ba servisu sidadania.

Órgauns Komunikasaun Sosiál sira bele sai hanesan kareta (meius) importantes atu dezenvolve asoens ba edukasaun sívika no promosaun ba boa sidadania, ho forma inovadora (foun), kontribui atu ema bele komprende prosesu polítiku nasional, i bele konta ho apoiu hosi Órgauns Soberania sira.

- Ba Governu, **Polítika Defeza Nasionál** tenke tau iha konsiderasaun restruturasaun sektór Defeza, atu bele halo militares sira sai hanesan ezemplu iha sira nia komportamentus profisionais no sira nia lala'ok, atu nune'e sira labele de'it hola parte ativa iha rekonstrusaun Paíz, maibé partisipa mós ho dignidade iha misoens internasionais, hodi kontribui ba Paz Mundiál, buat ida ne'ebé Povu hotu-hotu hakarak.

Governu sei reforsa papél Forsas Armadas nian, hodi kria diplomas ne'ebé adekuadus (kona no natón lós) atu hadi'a dezempeñu (prestasun servisu) Forsas nian, hanesan Lei ba Defeza Nasionál no Forsas Armadas, atu nune'e bele dezeńia (halo) estrutura ida no estabese metodolojia ida ke defini Sistema Forsas Nasionais no nia dispozitivu, hamutuk ho meius umanus no materiais ne'ebé presiza atu hala'o nia misoens. Urjente tebes atu implementa reformas ne'ebé bele hanesan ho hirak ne'ebé Grupo Estudu ba Forsa 2020 halo ona, atu hasa'e kapasidade institusionál F-FDTL nian.

- Tuir Governu nia hanoin, **polítika Externa** nuudár domíniu ida importante tebes ba Timór-Leste tanba ne'e, sei servisu maka'as atu hetan fali kredibilidade no efetividade asaun internasionál iha Timór-Leste. Sei kontinua kuda no haburas polítika amizade no kooperasaun ho Países oioin iha Mundu.

Governu ida ne'e, hanesan Governus sira uluk, sei kontinua promove prezensa ativa iha Nasoens Unidas no fomenta kooperasaun multilateral ho ajênsias oioin iha Sistema Nasoens Unidas no ajênsias kooperasaun bilateral.

Haree ba nia insersaun geografika no pasadu istóriku, evolusaun ekonomia timorensa liga espesial liu ho evolusaun ekonómika no influênsia polítika países ASEAN, Fórum Illas Pasífikus ne'ebé tama mós Austrália no Nova Zelândia, no países dominantes iha Ázia hanesan Xina ho Japaun.

Partisipasaun ativa iha CPLP no reforsa relasoens ho Uniaun Europeia, ne'e mós intuitu Governu ne'e nian; iha primeiru kazu, liuliu ho perspetiva ba promosaun kulturál Lian Portugeza, iha segundu kazu, tanba esforsu ida ne'e bele iha papél determinate iha estrukturasaun ba situasaun polítika timorens no garantia abertura Timór-Leste ba Mundu.

Países hanesan Noruega, Irlanda, Estados Unidos América, Korea, Kuba no países integrantes iha instituisoens ne'ebé temi iha leten, kontribui barak ona iha áreas determinantes ba konsolidasaun Timór-Leste ne'ebé labele haluha relasoens ho Países hirak ne'e hotu.

Governu ne'e aposta ona atu servisu hodi reforsa **unidade, solidariedade no amizade entre Timor-oan sira** ne'ebé namkari lemo mundu, i sei fo atensaun espesiál ba sira, tanba sira mós halo parte integrante iha sosiedade timorens, goza mós direitus no deveres konstitusionais hanesan ita hotu.

Liñas ne'ebé orienta programa ida ne'e, integra (hatama) mós objetivus ne'ebé bele alkansa (hetan) iha prazu/tempu badak, médiu no naruk, ne'ebé integra hamutuk tán iha planus dezvoltimentu nasionál, rejionais no sektorais ne'ebé sei aktualiza, no estratéjias atu kombat kiak buat ne'ebé halo ona iha Países seluk, nune'e mós iha programas ho âmbito rejionál no internasinál, ho destake boot liu ba Objetivus Dezvoltimentu Milénium nian.

IV Governu Konstitusionál, mezmuke sei hasoru dezafius barak iha tinan lima ne'e laran, parte (avansa) ho optimizmu (laran metin) atu konkretiza (hala'o) nia programa, i sei halo buat hotu atu implementa tomak, i povu Timór maka iha direitu atu julga nia rezultadus.

PRIORIDADES BA KURTU PRAZU

Asaun governamentál ne'ebé konsidera hanesan prioritária, ne'ebé sei implementa molok tinan ne'e remata, maka uluk nana'in tenke buka rekupera (hetan fali) konfiansa ba órgauns no instituisoens Estadu nian.

Atu kumpri objetivu ida ne'e, Governu Kompromete nia-an atu iha tempu badak:

-Konsolida (hametin) seguransa iha Dili i iha Paíz tomak, hodi garante ba ema sira ne'ebé oras ne'e moris iha situasaun aat/todan nuudár ema, iha kampus akollimentu/refujiadus, atu fila fali ba sira nia uman, i fó mós ba sira meus ne'ebé presiza atu hahú/hadi'a fali sira nia moris.

-Solusiona/rezolve problemas petisionárius sira nian, hodi analiza no implementa rekomendasoens hosi Relatóriu Komisaun Notáveis nian, promove diálogu ho F-FDTL no aplika medidas justisa sosiál nian;

-Haree tuir ba esforsus hirak ne'ebé halo ona, solusiona problema Alfredo Reinado no nia grupu, hodi garante kedas katak justisa tenke hala'o;

-Kontribui ba dezvoltimentu komunitáriu, liu hosi fundus ne'ebé Governu uluk nian foin fahe ba Xefe Suku sira, hodi garante nia aplikasaun iha dezvoltimentu comunidades no kria sentrus komunitáriu, ne'ebé sei envolve comunidade tomak, atu comunidade ne'e rasik halo levantamentu ba nia nesidades prinsipais no promove nia dezvoltimentu hanesan responsável no jeradór ba rikeza, liuliu kona-ba knaar jovens sira nian;

-Hala'o auditorias ba organizmus públikus atu promove jestaun ida ho transparênsia no hahú prosesu reforma ba administrasaun públika.;

-Fomenta dezvoltimentu Sektor Privadu atu dudu arranke ekonómiku Paíz nian no fomenta kriaun empregus, liuliu ba kamada joven iha Paíz ne'e;

-Aselera pagamentu pensoens kombatentes libertasaun nasional no sira nia lejítimus erdeirus, tuir lei no kria (halo) diplomas lejislátivus ba protesauun sosiál ba populaun ne'ebé presiza liu, hodi fó prioriedade ba ferik no katuas sira;

-Aprova Orsamentu Tranzisaun nian, ne'ebé korresponde ba nesidades prioritárias no beins i servisu, to'o 31 Dezembru 2007;

-Prepara Orsamentu Jerál Estadu nian, ba Anu Fiskál 2008, ajusta ho nesidades reais Paíz nian, hodi hala'o planu dezvoltimentu nasional integradu, ne'ebé bele dudu transfromasaun radikál ba populaun nia kondisoens moris, hodi altera kedas ona Anu Fiskál ba Anu Sivíl.

Governu ida ne'e iha vizaun kona-ba Paíz ne'e sei sai oinsá lós iha tinan 2020, ne'ebé sei foti dignidade povu timorens:

- Harii Paíz prósperu ida, iha ne'ebé Timór-oan hotu bele iha hahán, uma no hatais;
- Paíz ida ne'ee' labarik sira bele eskola i bele hasai netik eskola Primária;
- Paíz ne'ebé ho índise mortalidade kiik liu;
- Paíz ida ne'ebé populaun tomak bele hetan servisu bázikus iha saúde;
- Paíz ida ne'ebé la iha dezigualdades sosiáis no ho baze iha jêneru;
- Paíz ida ho infraestruturas ne'ebé presiza, fó qualidade moris ba nia sidadauns hotu, bele hala'o dezvoltimentu sustentável no halakon asimetrias rejionais;
- Paíz ida ne'ebé timor-oan sira bele hetan servisu di'ak no laiha dezempregu.
- Paíz ida ne'ebé kultura Paz, estabilidade no tolerânsia mak manda.

Atu buat hirak ne'e hotu bele hetan, Governu ida ne'e determinadu atu kria kondisoens nesárias atu bele halao dezvoltimentu nasional no sei dezvoltolve estrátéjikas

konsolidadas iha planu asaun konkretu durante tinan lima mai ne'e, tanba ne'e Governu sei:

-Dezenvolve Planu Estratéjiku Dezenvolvimentu Nasionál, hodi aktualiza planu tinan 2002 nian , ho suporte hosi projetu planifikasaun ekonómika ne'ebé kona lós ba nesidades reais no konverje (dada hamutuk) planus oioin no projetus hirak ne'ebé hala'o ona maibé la iha koordenasaun, atu bele kria kuadru dezenvolvimentu ida ne'ebé bele hametin unidade nasional iha níveis hotu-hotu hanesan : ekonómiku, sosial, administrativu nst – ho vizaun ida ke klaru ba tinan10 to'o tina 20 mai ne'e.

LIÑAS PROGRAMÁTICAS GOVERNU NIAN

Liñas programáticas ne'ebé prezenta iha dokumentu ne'e sei dezenvolve durante Lejislatura ida ne'e, no nia ezekusaun temporál sei hala'o tuir prioridades konstantes iha Planu Dezenvolvimentu nasional i hatama iha Orsamentus Estadu nian, ne'ebé tinan-tinan sei prezenta ba Parlamentu Nasionál.

Kapítulu I

Kreximentu Ekonómiku

1.Agrikultura

Agrikultura nuudár atividade ekonómika prinsipál iha Timór-Leste. Sei Agrikultura subsistênsia, tanba emprega forsa traballu família nian rasik. Práttikas kultivu (halo to'os) iha partes barak Paíz laran, aleinde produz sasán uitoan liu halo mós degradasaun (estrágus) ekolójika, hanesan sunu rai arbiru, halo deflorestasaun (ta'a no estraga ai) no erozaun (estraga) rai. Produtividade menus liu ne'e tanba teknolojias ne'ebé uza sei fraku i la'ós adekuaudu/apropriaudu no falta preparasaun rekursus umanus. Depoi klima, topografia rejiaun mós afekta podusaun agríkola.

Governus nia objetivus maka :

- Liu hosi faze agrikultura subsistênsia ba agrikultura merkadu;
- Liu hosi estádiu produsaun uitoan ne'ebé halo namkari, ba espesializasaun rejional ba produsus;
- Liu hosi siklu konstante tempu bai loron nian ba infra-estruturasaun kona-ba rezerva bee no halo kanais irrigasaun, hodi garante produsaun no dudu maka'as liután dezenvolvimentu agrikultura;
- Hamenus dispariedades rejionais, liu hosi rehabilitasaun sentrus extensaun rural, estradas no dinamizasaun merkadus.

Governu hakarak hala'o planu diversifikasaun no intensifikasaun ba produsaun agríkola, atu bele estabelese merkadu internu, ne'ebé bele garante eskolhamentu (lori sai) produsus, tuir perspetiva autu-sufisiênsia alimentár, hodi kontribui atu loke “nichos de mercado” externus ba médiu prazu.

Governu kompromete nia-an atu dezenvolve esforsu tomak hodi koordena inisiativas oioin, hanesan inisiativas lokais no ho parseirus dezenvolvimentu, atu hala'o dezenvolvimentu rurál integradu, no mós formasaun i edukasaun, investigasaun no sentrus rekursus agríkolos.

Nune'e Governu haka'as-an ona atu hala'o polítika agríkola no dezenvolvimentu rurál ne'ebé bele halo:

- Promosaun no formasaun rekursus umanus, hodi harii sentrus formasaun tékniku-agríkola iha nível distritál;
- Adopsaun referensial ba prioridades ne'ebé fó valór ba kompetitividade, defende ambiente, qualidade no spesifisidade, inovasaun, multifunsinalidade no diversifikasaun produsaun agríkola;
- Revizaun nokriasaun lejislasaun adekuada ba agrikultura no arborikultura;
- Investimentu teknolójiku atu hala'o mekanizasaun agrikultura;
- Produsaun no promosaun produsu ne'ebé bele fa'an iha merkadu rejional no internasionál;
- Optimizasaun (hasa'e) produsaun: hare, batar, fehuk midar, ai-fariña, talas, fore-rai, fore xikote, fore keli no koto;
- Optimizasaun produsaun hortikultura: modo no aifuan;
- Optimizasaun produsaun plantas industriais nian: nuu, kafé, sândalu nst.
- Optimizasaun produsaun produsu naun-florestais (ai-laranboot) hanesan rota, au no bani-been;
- Protesaun kontra moras plantas (ai-horis) ne'ebé bele hán;
- Extensaun zonas ba natar, to'os iha rai ne'ebé soe/husik mamuk hela;
- Subsídium fertilizantes no ekipamentus básikus ba agrilultores sira no mós promosaun produsaun fertilizantes orgânikus;
- Hala'o estudus tuir fazes hodi hanoin kona-ba: i) rehabilitasaun eskemas irrigasaun ne'ebé iha ona, ii) halo dikes no métodos irrigasaun foun, no iii) dezenvolve sistemas jestaun ne'ebé bele hala'o planus kona-ba irrigasaun;
- Promosaun ba Asosiasoens Agrikultores no Utilizadores Bee;
- Kriasaun sentrus Prosesamentu hahán;
- Kriasaun Sentrus Sementes (fini) Agríkolos, iha nível rejional no distritál;
- Kriasaun sentrus rezerva Alimentár (Ai-hán), ba situosoens ne'ebé iha krize umanitária ou la iha merkadu;
- Promosaun kriasaun kooperativas agríkolos no estabese mekanismus kréditu agríkola, inklui eskemas mikro-kréditu, liuliu ba feto no grupus ne'ebé dook hosi merkadu traballu formál;
- Promosaun ba konsersasaun rai, bee atu prevene/evita erozaun;
- Promosaun ba konsersasaun biodiversidade no prezersasaun espésies indíjenas (ai-horis rai ida-idak nian);
- Aumenta tán número plantas (ai-horis) hahú hosi sentrus reproduasaun no tratamentu ba sementes (fini), liu hosi kriasaun viveirus, ne'ebé bele hodi halo dezenvolvimentu no multiplikasaun ba kafé, ai madre-kakau, nú, baunilla nst.

- Hadia servisu atu bele desenvolve agrikultura, ho infra-estruturas, estradas, komunikasaun, transporte, merkadus nno sentrus prosesamentu no extensaun.

2. Peskas no Aquacultura

Timór-Leste iha potencialidades atu produz ikan barak maibé atividade ida ne'e sei kuran no subdesenvolvida/atrazada hela. Rejioens prinsipais atu tiha ikan maka kosta norte (tasi feto) no kosta sul (tasi mane) Paíz, ne'ebé bele hetan ikan no mariskus oiain, barak liu ba konsumu internu, i dala barak labele bá to'o iha foho.

Aleinde iha tasiibun ne'ebé naruk kilométru 700, Paíz ne'e iha mós rekursus bee moos ne'ebé bele uza ba desenvolvimentu atividades aquacultura.

Governu ida ne'e hakarak kontribui atu kona-ba hahán, populasoens sira bele konsome mós ikan iha Paíz tomak laran, hadi'a sistema peskeiru no explora rekursus akuátikus, no jere rekursus hirak ne'e ho forma sustentável.

Dezenvolvimentu indústrias kiik no natón nian iha sektór ida ne'e, la'ós de'it hanesan fonte (fatin) atu hetan empregu maibé hanesan mós fonte hatama divizas (osan) ba Paíz, karik hakarak desenvolve exportasaun produsu hirak ne'e.

Governu propoen atu desenvolve sektór ida ne'e liu hosi:

- Investimentu ba ekipamentu adekudu atu promove infra-estruturas, teknolojia no maun-de-obra (traballadores) atu explora rekursus potenciais iha Kostas Timór-Leste nian;
- Reforsu ba ensinu tékniku iha áreas Peskas no Aquikultura;
- Hadi'a Jestaun iha Sektór ida ne'e, liu hosi promosaun atu harii Sentrus ba Asosiasoens Peskadores;
- Kriasaun insentivus ba Asosiasoens, ne'ebé enkuadra halo di'ak iha mekanismus kontrolu no efisiênsia;
- Dezenvolvimentu indústrias Peskas no Prosesamentu, konsersasaun no transformasaun hosi ikan matak ba ikan habai maran no tamu;
- Dezenvolvimentu prosesu Aquacultura.(bee moos, masin no tasi).
- Dezenvolvimentu peskizas iha sektór ne'e.
- Hadiá sistem akompañamentu, avalaisaun, no fiskalizesaun iha Sektór.

3.Pekuária

Pekuária nuudár atividade ho potencialidades boot iha Timór-Leste, ne'ebé bele kontribui atu hadi'a dieta aliment'ar (hahán) populausaun nian.

La haluha katak atividade ida ne'e relaciona metin ho fatores kulturais no tradisionais, tanba valór sentimentál no prestíjiu ne'ebé animál balu representa ba populausaun, Governu defende katak tenke apoia ho insentiva pekuária, atu nune'e bele garante bases

dezenvolvimentu ba indústrias kiik no natón nian kona-ba na'an, susu-been, manteiga, keiju, ba konsumu internu i ba exportasaun iha futuru.

Kona-ba dezenvolvimentu iha sektór ne'e, Governu sei:

- Estabelese polítika dezenvolvimentu pekuária no veterinária no haree di'ak fali hodi kria lejislasaun adekuada ba dezenvolvimentu sektór, hanesan: Lei Quarentena kona-ba importasaun/exportasaun animais no produsus; Leis no Regulamentus veterinária ba produsaun animais ho matadourus.
- Hadi'a servisu veterinárius;
- Investe iha kampañas reproduasaun no vasinasaun atu bele aumenta númeru animais;
- Promove formasaun téknika iha área agro-pekuária;
- Dezenvolve pastajens no impulsiona investigasaun no informasaun agríkola, hodi kontribui atu hamate duut hirak ne'ebé aat i bele estraga hahán ba animál no pastajens (fatin no duut barak ba hakiak karau) naturais.
- Dezenvolve estabesimentu indústris agro-pekuárias kiik no natón nian;

4.Rekursus Naturais

Timór-Leste riku ho rekursus naturais no minerais, inklui petróleu no gás. Rekursus ne'e balu explora daudaun ona maibé barak liu maka seidauk explora no dezenvolve hodi benefisia dezenvolvimentu ekonómiku no sosiál Paíz.

Governu ida ne'e defende polítika loos nian kona ba utilizaasaun rekursus naturais no minerais, haree tuir kontextu Paíz, fó priviléjius ba atores nasionais, kria empregu no promove dezenvolvimentu sustentável, liu hosi planifikasaun, koordenaasaun no armonizaasaun ba polítikas transversai (multisekotriais), hodi labele haluha hala'o hamutuk prezervasaun ambiente, jestaun rekursus naturais no minerais no hadi'a populasoons nia qualidade moris.

Só ho Planu Estratéjiku ba Dezenvolvimentu Nasionál maka bele orienta utilizaasaun, kontrolada no efisiente ba reseitas ne'ebé mai hosi rekursus hirak ne'e no bele garante planu ida, ne'ebé seguru kona-ba investimentu atu hetan tan reseitas. Tanba ne'e, fundamentál tenke iha transparênsia jestaun ba prosesu ida ne'e i transparênsia ida ne'e só bele iha, karik asuntu kona-ba rekursus naturais la'ós mesak de'it iha governantes (ukun na'in) no polítikus sira nia liman.

Aspetu seluk ne'ebé fundamentál maka kombatê partidarizmu iha sektór ida ne'e, tantu iha organizmus sira ne'ebé hola konta servisu ida ne'e, no mós iha mekanismus kontrolu, ne'ebé tenke obedese (halo tuir) kritérius kona-ba kompetênsias téknikas no profisionais.

Governu kompromete-an atu hala'o jestaun rekursus naturais hodi garante sustentabilidade ba rekursus hirak ne'e, hodi nune'e bele dezenvolve enkuadramentu makroekonómiku ida ke bele proteje jerasaun ida ne'e nia interesos no salvaguarda interesos jerasoons iha futuru; nune'e iha nia Planu Dezenvolvimentu Nasionál, sei defini, prioridades ne'ebé tenke atende uluk i sei define mós tempu no montante ba poupanças,

ho planu investimentu ida ne'ebé klaru kona-ba reseitas mai hosi rekursus naturais no minerais, atu bele hetan tán reseitas hodi promove maka'as liután kreximentu ekonómiku Timór-Leste nian.

Atu alkansa (hetan) dezígniu/objetivu ida ne'e, Governu sei fó prioriedade ba aspetus hirak tuir mai ne'e:

- Estabelese programa integradu ida ba dezenvolvimentu rekursus umanus iha sektór ida ne'e. Sei hatama mós ho bolsas estudu no harii Institutu Jeolojia no Petróleu maibé servisu hamutuk ho Universidade Nasionál;
- Servisu hamutuk ho autoridades iha sektór ida ne'e no ho koordensaun Sekretaria Estadu ba Rekursus Naturais, hodi halo reforma ne'ebé sei inklui remodelasaun ba kuadrus téknikus no dirijentes iha sektór ne'e nia okos;
- Promove aprovasaun ba Leis no Regulamentus atu responde nesesidades reais Paíz ne'e nian;
- Estabelese polítikas no kria mekanizmus nasionais sustentáveis jestaun nian, ne'ebé bele possibilita Governu atu hala'o didi'ak supervizaun, regulaun no kontrolu iha área ida ne'e;
- Regula atividades no halo akordus internasionais, ne'ebé bele loke tán empregus ba timór-oan sira;
- Promove no atrai investimentu iha sektór petróleu iha territóriu nasionál, atu lori *pipeline* mai Timór-Leste;
- Promove polítikas protesaun ba ambiente iha explorasaun rekursus minerais;
- Formula política seguransa enerjética nasionál ho kooperasaun ho sekretaria Estadu ba Política Enerjética;
- Estabelese Kompañia Nasionál Petróleu nian;
- Dezenvolve estudus no levantamentus jeolójikus iha territóriu tomak, atu halo mapa jeolójiku Paíz nian foun ida no halo primeiru inventáriu ba rekursus naturais no petrolíferus 'onshore' (iha rai laran).
- Kria mekanizmus atu Sektór Petróleu neinek bele haketak hosi kestoens polítikas;
- Promove transparênsia no rigór iha sektór ida ne'e liu hosi kriaun "iniciativa ba Transparênsia IV Governu Konstitusionál", ne'ebé hanaran : "Modelu Transparênsia Timor-Leste".
- Kria "Komisaun rekursus Naturais naun-renováveis", komposta hosi membrus mai hosi partidus lima ne'ebé boot liu; Komisaun ida ne'e tenke autónoma no sei funsiona hanesan órgaun konsultivu, hodi apresenta rekomendasoens ba Órgauns Soberania nian;
- Kaer nafatin política informasaun ba populaun kona-ba dezenvolvimentu sektór ida ne'e nian, nuudár asuntu estratéjiku ida ba dezenvolvimentu nasionál.

5. Política Enerjética

Sosiedade Timór iha nia vertente no dezenvolvimentu ekonómiku labele desliga (haketak) fali hosi explorasaun no konsumu enerjias, ho nia forma kuantitativa no kualitativa, ne'ebé mai hosi fontes produsaun oiain.

Nune'e fundamentál atu define polítika enerjética ne'ebé klara atu tau hamutuk intereses oioin hosi merkadu, haree tuir óptika kompetitiva no respeita qualidade meu-ambiente, hodi evita industrializasaun ne'ebé sabra'ut i la iha regulamentasaun di'ak nian.

Sektór enerjétiku hanesan sektór ekonomia Paíz nian ida ne'ebé kompleksu liu, tanba afekta populasaun tomak; apezar de Paíz ne'e iha rikeza boot hosi fontes enerjia no enerjias alternativas, sei depende nafatin ba fontes externas, hanesan importasaun konbustíveis no gás ba uzu doméstiku.

Panorama jerál Paíz ne'e nian bele karakteriza hanesan kuaze ke la iha infra-estruturas atu fornese eletricidade, ne'ebé la to'o atu fahe ba populasaun hotu. Implementasaun Planu globál , konsertadu ho fazeadu, sei kontribui atu fahe barak liután enerjia iha Paíz tomak laran, ho impaktu maka'as atu hadi'a ema nia qualidade moris no ba promosaun investimentu i kreximentu industriál, nuudár fontes potenciais atu loke empregu no aumenta reseitas ba Estadu.

Governu ida ne'e kompromete nia-an atu iha tempu badak:

- Analiza estudus no projetus ne'ebé hala'o ona kona-ba: idroelétrikas, biomassas, biogás, petróleu hosi tasi Timór, atu dezenvolve explorasaun no produsaun enerjias ba produsaun eletricidade no uzus doméstikus seluk tán, i foka liu ba *Gas Seep Aliambata*, projetu barrajens idroelétrikas Ira lalaro, iha Ainaru no Amununo no mós biomassas;
- Estabelese modelus kontrolu no fiskalizasaun i normas reguladoras ba projetus ne'ebé halo tiha ona ka seidak halo;
- Elabora lejislasaun atu regula no tau hamutuk atividades estudu, explorasaun no produsaun fontes enerjéticas renováveis no naun-renováveis;
- Asepera projetu enerjia Ira lalaro;
- Fiskaliza atividades Biomassas no mini idroelétrika iha Gariwai;
- Estabelese rede eletricidade ba Oe-Cusse Ambeno, bazeia ba uzu enerjias alternativas.

Liñas boot kona-ba polítika enerjética Governu ida ne'e nian monu liu bá oinsá buka enerjias alternativas renováveis, atu garante enerjia ne'ebé presiza ba konsumu doméstiku no industriál, hodi labele haluha prezervasaun meu-ambiente, no prosege/kontinua ho objetivus hanesan tuir mai ne'e:

- Reduz/hamenu dependênsia enerjética, hodi hatún importasaun liu hosi utilizasaun fontes enerjia alternativas hanesan: idroelétrikas, biomassa, biogazes, enerjia solár, turbinas, enerjia sinética hosi anin, enerjia kímika ne'ebé halibur iha ai no modo tahan, no mikroorganismos ne'ebé barak tebes iha Paíz ida ne'e;
- Promove aproveitamentu idroelétriku ho fins múltiplus (barak) atu halo produsaun enerjia no aproveitamentu bee;
- Regula explorasaun fontes enerjia alternativas no renováveis, hodi kontribui mós ba uniformizasaun no integrasaun projetus oioin ne'ebé sei dezenvolve iha Paíz, iha área ida ne'e;

- Fornese enerjia ba populasaons ne'ebé moris iha zonas izoladas;
- Asegura ba jerasaun aban-bainrua nian, kona-ba benefísius hosi rikeza enerjética iha Paíz, liu hosi definisaun no prezervasaun “rezervas obrigatórias”, mai hosi fontes renováveis no mós hosi fontes naun-renováveis;
- Kria regulamentasaun apropiada atu operadores nasionais sira mai ezerse papél relevu iha explorasaun rekursus enerjéticos;
- Dezenvolve padroens seguransa ekilibrada, atu asegura continuidade ba explorasaun, produsaun no fornecimentu i abastecimentu;
- Dezenvolve programas formasaun ba operadores no konsumidores, hodi insentiva mós konsumu enerjias ne'ebé moos ba ambiente;
- Adapta programas investimentu ba operadores redes elétricas atu interliga produsaun descentralizada;

Atu promove competitividade nasional, Governu kompromete-an atu kria kondisoens hodi abastese merkadu, hodi halo liberalizasaun (hadi'a servisu no promove kooperativas no privatizasaun sektór), hala'o estudus viabilidade kona-ba enerjia ba merkadu nasional no internasionál i ikus liu ona, kria mekanizmu hodi atraí investimentu externu.

6.Komérsiu, Indústria, Sektór Privadu no Servisu

Komérsiu ho atividades transformadoras, desenvolvimentu sektór privadu no fomentu investimentu estranjeiru, hamutuk ho desenvolvimentu servisu ne'ebé hanesan suporte finanseiru no protesau ba investidores, sei sai nuudár motór fundamentál ba kreximentu ekonómiku Timór-Leste nian.

Governu decide ona atu hala'o desenvolvimentu iha sektores hirak ne'e hanesan mekanizmu importante tebes atu halo redusaun ba pobreza no kombate hasoru dezempregu, hodi kontribui metin ba estabilidade sosiál no polítika Paíz nian.

Medidas transversais ida iha sektór ne'e, atu estimula ekonomia País, maka kriasaun mekanizmus formasaun no kapasitasaun, sei inklui apoiu finanseiru, ho forma empréstimus ho taxa juru mínimas, ho akompañamentu no kontrolu dí'ak, atu nune'e jovens no dezempregadus sira, bele iha kapasidade atu hahú sira nia negósus rasik, medida ida ne'e sei bele kombate mós dezempregu.

6.1.Komérsiu

Komérsiu hanesan fonte ida mós atu hakiak rikeza (riku-soin), maibé seidak sai hanesan objetivu ba ema atu halo intervensaun ne'ebé dí'ak, ne'ebé bele impulsiona (dudu) kapasidade nasional komersiantes timor-oan, hodi invert/muda tiha tendênsia ohin-loron nian ne'ebé komersiantes estranjeirus maka kontrola fali Komérsiu iha Timór-Leste;

Koalia kona-ba komérsiu externu, limita de'it ba exportasaun merkadorias balu, barak liu maka orijen agríkola, i tanba la iha indústrias transformadoras signifika katak beins

ne'ebé exporta labele manufaktura fali, transforma fali, labele viabiliza okupasaun maun-de-obra nasional.

Governu propoen atu:

- Fomenta formasaun komersiantes nasionais, iha nível evolusaun koñesimentus kona-ba kapitál no kapasidade jestaun;
- Regulamenta práttikas komersiais tuir lójika respeita regras, promove merkadu konkorensiál ne'ebé di'ak, ho tendênsia atu halakon práttikas komersiais espekulativas no atu salvaguarda maioria populasaun n'ebé to'o agora la iha kbiit atu halo kompras.
- Lejislá kona-ba komérsiu esternu, buat ida ne'e relasiona ho regulasaun aduaneira no alfândegas, atu hamenus tiha poderes diskrisionáriu hosi administrasaun nian atu halo impozisaun kona-ba restrisoens komersiais;
- Fomenta aumentu exportasaun, tau hamutuk dezígniu ida ne'e ho dezvoltimentu agrikultura, pekuária no peskas hodi hanoin kona-ba komérsiu ba beins ne'ebé mai hosi sektore hirak ne'e hotu;
- Atu hetan parseirus komersiais, liuliu viziñus sira ne'ebé besik liu hanesan kazu Austrália, no Paízes ASEAN.

6.2 Indústriá

Tesidu industriál Timór-Leste nian, rezume de'it ba indústrias rudimentares (kiak no atrazadu nian), ne'ebé orienta mesak de'it ba merkadu internu hanesan: Artezenatu lokál liuliu iha área teselajen (halo tais), traballus artístikus halo hó ai, serrasoens, serâmika, unidade fabrika ne'ebé kiik atu hodi deskaska hare no ba tratamentu ba kafé no indústrias ekstraktivas, hanesan kazu extrasaun rudimentár masin nian.

Potensiál ne'ebé iha kedas atu halo industrializasaun Paíz limitadu tebes tanba maun-de-obra kualifikada la iha, buat hotu karu maibé saláriu uitoan no la iha transportes atu dezvoltolve indústrias boot.

Apezarde opsaun di'ak liu maka loke dalan ba investimentu estranjeiru, Governu sei aposta mós iha indústrias kiik atu bele halo sai modernu no ba ita nia nesidades internas, hodi promove sistemas insentivus ne'ebé iha futuru bele lori ba merkadu esternu.

Governu propen-an atu:

- Kria regulamentasaun ne'ebé bele privilijia (ajuda liu) indústrias timór nian rasik hodi kombat indústrias transformadoras ne'ebé barak demais i empresáriu estranjeirus mak kaer, hodi aposta atu beins(sasán) esensiais ba prosesu dezvoltimentu, hanesan materiais konstrusaun, utensílius/sasán dapur nian, vestuáriu/roupa, indústrias hahán no transformasaun ai ita nia investidores nasionais maka kaer rasik.
- Promove polítikas ba substituisaun importasaun, haree tuir nia vantajens komparativas ba dezvoltimentu indústriá ne'ebé bele loke postus traballu

barak, liuliu iha zonas rurais, no rekursus ne'ebé se bele karik, uza metérias primas lokais mai hosi produsaun agríkola, hosi peskas no extrasauun minerál.

- Apoia dezenvolvimentu empresas industriais kiik no natón nian iha zonas rurais, atu bele sai hanesan ajentes potenciais ba inovasoens teknolójikas.

6.3. Sektor Privadu, Kooperativas PME

Sektor privadu maka parseiru esensiál iha dezenvolvimentu nasional tanba bele buka rasik rikeza/osan no loke empregu, la depende ba atividades empregu hosi Estadu, i bele mós hetan reseitas ne'ebé hodi dudu dezenvolvimentu ekonómiku sustentadu Paíz ne'e nian.

Governu kompromete nia-an atu fó apoiu tomak ba kriasaun empresas kiik no natón nian, laós de'it atu fó valór ba produsus nasionais maibe atu insentiva/dudu atividades produtivas, hodi nune'e bele loke tan empregu iha populasoens nia leet. Governu haka'as-an mós atu insentiva kooperativas, hodi bele hakat liu difikuldades ne'ebé produtores individuais kiik sira hasoru.

Sektor privadu merese atensaun espesiál i tenke simu liu apoiu hosi Estadu, maibé tenke tuir kritérius kona-ba kompetênsia, valór, onestidade no kapasidade tekniku-profisionál, hodi kombate klientelismus polítikus ne'ebé estraga de'it prosesu rekonstrusaun Paíz.

Investimentu direktu estranjeiru, iha Paíz ne'e, sei sai mós hanesan motór dezenvolvimentu no kriasaun empregu, liuliu ba jovens sira, ne'ebé presiza garante katak investidores sira tenke hatene kona-ba oportunidades investimentu ne'ebé iha i ke sira bele investe tuir Paíz nia intereses, hodi fó benefísius ba povu tomak i la'ós ba grupu kiikoan ida mesak.

Iha Lejislatura ida ne'e, Governu sei aposta atu:

- Ba optimizasaun “Ajénsia Especializada ba Investimentu”, hanesan kondisaun neserária no fundamentál ba dezenvolvimentu iha tipu atividades hanesan ne'e, ne'ebé ho autonomia boot liu haketak husi poder polítiku, hodi bele garante dia'k liu transparênsia, hodi kontribui atu hadi'a imajen Paíz ne'e nian, no promove diplomasia ekonómika ida ke ativa.
- Ba revizaun Lei Investimentu, atu bele sai hanesan ferramenta (meiu) ida atu dada investimentu esternu;
- Ba kriasaun mekanismus seguransa no sertezas jurídkas ne'ebé Paíz ne'e bele oferese;
- Ba definisaun rejime kona-ba propriedade, beins imóveis no sasán seluk-tan ne'ebé tenke hodi bá rejistu;
- Ba aprovasaun urjenti ba Lei kona-ba Terras i Propriedades no ba dezenvolvimentu mekanismus atu rejista direitos kona-ba Propriedades Rai, atu nune'e bele evita katak potenciais investidores sira lakohi kanaliza sira nia rekursus ba Timór-Leste, tanba risku arrenda/aluga rai para atu ikus mai bele hamosu fali konfliktus tanba okupasoens ilegais;

- Fornese apoiu institusionál ho efisiênsia, liuliu, tanba atu simplifika investidores sira nia moris, hodi kria kondisoens no mekanizmus finansiamtu no insentivus ba empresas nasionais, atu nune'e sira hotu bele konsege objetivu kompetitividade;
- Ba kriasaun empregu, halo parserias ho sektór privadu;
- Ba estabelesimentu sistema simplifikadu ida kona-ba impostus, halakon dualidade impostus (saláriu no rendimentus ema ida-idak nian), hodi substitui/troka ho ida de'it, ho taixa menus liu no justa sosialmente, i ba sira ne'ebé saláriu ho rendimentu kiik lalika selu;
- Ba redusaun karga fiskál, to'o metade, atu serve di'ak liu ba interesses Paíz, hodi aplika justisa fiskál;
- Ba revizaun kona-ba prosedimentus rejistu no lisenSIamentu ba movimentus/tranzasoens ho estranjeiru, atu simplifika liután.

Governu sei insentiva estabelesimentu Kooperativas iha Paíz tomak, no propoen agora kedas atu:

- Haree di'ak fali Lejislasaun kona-ba Kooperativas;
- Haree di'ak fali papél kooperativas atu bele funsiona di'ak no sai hanesan ajensias ekonómikas importantes;
- Fasilita no fó apoiu ba sektór Kooperativas;
- Forma Instituisoens ba Apoiu ba Kooperativas, negósiu kiik no natón nian.

6.4 Servisus – Banka ho Segurus

Dezenvolvimentu ajênsias bankárias no segurus nasionais hanesan mós imperativu ida ba Paíz soberanu. Governu sei dezenvolve estudus atu kria ajênsias hirak ne'e, ho ipóteze katak Estadu rasik sei ajuda no dudu servisus hanesan ne'e, liu hosi partisipasaun kapitais públikus;

Hanoin katak Autoridade Bankária no Pagamentus Timór-Leste (futura Banku Sentrá), maka iha kompetênsia ba lisenSIamentu, regulasaun no supervizaun ba bankus komersiais i kompañias Segurus i Intermediários ba Segurus iha Paíz, maka uluk nana'in presiza haree di'ak fali lejislasaun ne'ebé aprova tiha ona kona-ba matérias hirak ne'e, hodi aprova kedas ona Lei Orgânica Banku Sentrá Timór-Leste nian.

Iha âmbito ida ne'e laran, Governu propoen-an atu dezenvolve medidas ba implementasaun servisus hirak ne'e hanesan:

- Haree di'ak fali quadru lejislativu ne'ebé iha ona kona-ba kompañias segurus no entidades seluk relasiona ho atividades hirak ne'e no enkoraja atu loke kompañias hirak ne'e, hodi fó lisenSIamentus ne'ebé presiza, tanba ida ne'e sektór determinante ida atu hetan investimentu externu;
- Dezenvolve instituisoens mikro-kreditu hodi promove regulamentasaun no mekanizmus supervizaun no kontrolus ne'ebé presiza;

- Kria Banku Nasionál ba Dezenvolvimentu, hanesan instrumentu finanseiru atu fó apoiu ba Modelu Dezenvolvimentu Ekonómiku Sustentadu iha Timór-Leste, ho kapitais públikus barak liu.

7. Turizmu

Tanba Timór-Leste Paíz ida ho atrativus turístikus barak tebes, liuliu praias no foho, ita hein katak bele sai hanesan destinu/fatin dia'k ida atu dada turistas sira hosi Mundu tomak. Dezenvolvimentu turizmu hanesan fatór importante ba dezenvolvimentu ekonómiku Paíz ne'e, la'ós de'it ba reseitas ne'ebé bele hetan, no loke tan servisu, maibé ba dezenvolvimentu seluk-tán hanesan: restaurantes, otéis, entretenimentu, aeroportu Dili ho Baucau, transportes no infra-estruturas oioin.

Ami sei hamoris polítika promosaun turístika hanesan tuir mai ne'e:

- Operasionaliza Planu Nasionál Estratéjiku Turizmu nian, hanesan instrumentu ba delineasaun no ezekusaun polítikas nasionais ba sektór ida ne'e;
- Insentiva kriaun lejislasaun espesífika atu dinamiza sektór Turizmu;
- Kria zonas protejidas, liuliu ne'ebé di'ak ba Turizmu;
- Kria Sentru Nasionál Turizmu nian ida, ho delegasoens iha Distritus 13;
- Hahú konkursu nasionál ba dezenvolvimentu turístiku, hodi promove inisiativa privada;
- Promove expozisoens/feiras turizmu nasionais, rejionais no internasionais;
- Promove dezenvolvimentu produsos nasionais, di'ak ba merkadu Turistiku;
- Promove asoens formasaun iha área Turizmu, atu kapasita rekursus umanus iha área ida ne'e;
- Proteje vida marítima, liuliu korais atu evita sai aat i iha futuru bele sai hanesan sentrus atrasaun turístika;
- Haree liu ba karáter Timór-Leste ne'ebé seidak explora, hodi konsentra atensaun ba eko turizmu;
- Expande/habelar indústriia turístika hodi kolabora didi'ak ho comunidades, atu envolvimentu hosi comunidade bele aseguira katak povu Timór bele sai parseiru no benefisiáriu iha prosesu ne'e;
- Promove turizmu internu atu timór-oan sira bele aproveita atividades hosi dezenvolvimentu turístiku, benefisia ho ambiente rekreativu no kulturál, hodi reforsa identidade nasionál.
- Promove interkâmbiu entre ajênsias turístikas barak iha nível komunitáriu, atu bele fahe experiênsia no boas práttikas, atu Turizmu iha Timór-Leste bele hetan dimensaun nasionál
- Promove investimentu estranjeiru iha área turizmu maibé aseguira fatin ba maunde-obra nasionál no transferênsia koñesimentus ba timór-oan sira.

Kapítulu II

Reforma Jestaun Estadu nian

Atu aplika medidas polítikas ba dezvoltamentu sosiu-ekonómiku Paíz ne'e no hamenus kiak, buat ne'ebé presiza uluk liu, maka Estadu rasik tenke halo transformasaun radikál atu halakon partidarizmu ne'ebé iha Administrasaun Públika ida ne'ebé sentralista, todan no ineficiente, ne'ebé estraga mentalidades.

Tanba halo ona kompromisu polítiku atu labele simu eskemas favoritizmu, maka Governu ida ne'e tenke supervizona/kontrola membrus Governu nian rasik atu nunka bele tau sira nia interesses individuais iha intereses kolektivus nia leten no promove ambiente responsabilidade no integridade iha Konsellu Ministrus, atu nune'e bele sai hanesan modelu ezemplár atu ajentes públikus hotu bele banati tuir.

Medida uluk liu nian atu garante integridade ho transparênsia iha lala'ok membrus Governu, bele konsubstansia/kompleta ho disponibilidade ne'ebé membrus hotu-hotu Governu nian hatudu ona atu halo deklarasaun kona-ba sira nia beins, ne'ebé sei rai iha Tribunál Rekursus no hodi bele halo verifikaun wainhira mandatu remata. Ida ne'e hanesan kompromisu polítiku klaru hosi parte Membrus Governu, tanba sira empenhadus ona atu hala'o boa governasaun ne'ebé rigór ho verdade maka manda ema hotu nia lala'ok.

Rekuperasaun konfiansa iha futuru buat ida ke asosia/liga ho prestíju instituisoens demokrátikas hotu-hotu no nia dignifikasaun iha Timór-tomak nia matan, ne'ebé ejize duni kredibilidade iha sistema polítiku, ho reformas iha nia estruturasaun no mós nia lala'ok.

Atu bele akontese hanesan ne'e, Governu sei prioritiza:

- Kombate ba korrupsaun iha Governu no Administrasaun Públika;
- Implementasaun prinsípius boa Governasaun nian, hodi enkoraja partisipasaun povu nian iha desizoens polítikas;
- Kriasaun mekanizmus transparênsia atu foti desizoens polítikas;
- Kriasaun lejislasaun kona-ba mekanizmus konsulta ho comunidades no sosiedade sivil;
- Ativasaun sistema komunikasaun sosiál nian ida no fó sai atu populaun bele hatene kona-ba desizoens polítikas ne'ebé nia representantes sira halo;
- Revizaun lejislasaun kona-ba Konkursus Púplikus no implementasaun didi'ak nian relasiona ho kultura transparênsia;
- Revizaun ho melloria (halo di'ak liután) sistema rekrutamentu funsionáriu públikus;
- Kriasaun kondisoens ba dignifikasaun funsionáriu públikus, hodi promove ekuidade/igualdade entre sira. Iha kontektu ida ne'e, sei hala'o estudus avaliasaun kona-ba possibilidade atu fó subsídios ba izolamentu; ho hanoin katak iha fatin balu Paíz ne'e laran, kondisoens moris no kustus kona-ba transportes no sosa sasán sai todan tebes, ne'ebé halo kondisoens funsionáriu Estadu sira la hanesan;

nune'e ita bele halakon ona funsionáriu balu sira nia hanoin atu lakohi ba servisu iha interiór ka foho.

Atu bele halo Reforma, prezisa haree aspetus hotu-hotu relevantes ho Administrasaun Públika no prepara planu atuasaun konsertada ida ke bele provoca mellorias substansiais (hadí'a buat barak). Tanba ne'e Governu sei halo levantamentu ba quadru ne'ebé iha ona atu implementa asoens reformadoras hodi haree ba: Funsoens Administrasaun nian, nia estrutura, organizasaun administrativa, pesoál (jestaun, representasaun, volume globál, aperfeisoamentu profisionál, estatutu, karreiras, vensimentus, regalias), instalasoens no ekipamentu, métodos traballu, relasoens ho públiku, ensinu iha área administrativa no sistema kontrolu (jurídiku no naun jurídiku) kona-ba atividades iha Administrasaun.

Konvein/prezisa salienta mós katak Governu sei dedika nia-an atu halo reforma ba entidades hotu-hotu iha Administrasaun Públika, inklui mós ba institutus, asosiasoens no empresas públicas, servisu Estadu iha Estranjeiru, administrasaun sivíl, justisa no polísia i militar.

Governu hakarak atu reforma ne'e bele kontribui la'ós de'it ba mantein orden sosiál no asegura servisu públikus esensiais, maibé liuliu kontribui ba administrasaun dezvoltimentu Paíz nian, ne'ebé iha kbiit atu orienta ho impulsiona (dudu ba oin) progresu ekonómiku sosiál.

Reforma Administrasaun Públika bele posibilita dezvoltimentu tuir prinsípius hanesan ne'e:

- Prinsípiu Desburokratizasaun, tanba prezisa organizasaun boot liu no nia funcionalidade, hodi promove efisiênsia no fasilita sidadauns sira nia moris;
- Prinsípiu Aproximasaun Servisu Públikus ba Populosoens, mezmu iha fatin ne'ebé dook, tenke estrutura halo di'ak atu servisu hirak ne'e bele besik populosoens hodi servi ba sira, la'ós de'it tuir termus fízikus maibé psikolójikus no umanus, hodi multiplika (habarak) kontaktus ho populosoens no rona sira nia problemas, propostas ho keixas, atu bele satisfaz sira nia aspirasoens i la'ós interesses poder polítiku.
- Prinsípiu Partisipasaun ba interesadus hotu-hotu, espesial liu representantes Sociedade Sivíl, iha Administrasaun Públika, signifika katak tenke bolu sira atu intervein iha funsionamentu administrasaun pública no se bele karik partisipa wainhira hola desizoens administrativas;
- Prinsípiu Desentralizasaun, ne'ebé tuir Konstituisaun, ne'ebé Administrasaun Públika tenke desentraliza nia-an tanba ne'e tenke hola medidas kontra políticas sentralizadoras;
- Prinsípiu Deskonsentrasaun, signifika katak Administrasaun Públika sei deskonsentra liután nia kompetênsias.

1. Administrasaun Públika

Funsaun Públika maka aliserse jestaun Estadu nian. Governu sei hola medidas hotu ne'ebé presiza atu Funsaun Públika bele sai hanesan aparelu Estadu ida ke profisionál, efisiente no kapaz atu korresponde ba ejizênsias ne'ebé mosu dadaun, rezultantes hosi kreximentu kapasidade operasionál Eatadu nian.

Tanba ne'e tenke iha revizaun lejislativa no kriaun diplomas atu providensia kuadru legál ne'ebé presiza atu halo reformas. Karik hosi parte ida Governu ejize hosi Funsaun Públika atuasaun profisionál no efisiente, hosi parte seluk, Governu tenke kria kondisoens atu funsionáriu Estadu nian sira bele hala'o sira nia funsoens ho dignidade.

Kuadru salariál tenke haree didi'ak fali atu hatama marjens salariais hodi haree mós ba experiênsia ne'ebé hetan tiha ona durante tinan barak servisu, enkoraja atu formasaun la'o nafatin iha áreas traballu ida-idak nian, enkoraja kompetisaun saudável no kria oportunidades promosaun ho baze iha méritu no experiênsia.

Governu sei apresenta Fundu Apozentasaun ba Funsaun Públika no permite atu funsionáriu sira bele kontribui diretamente ba Fundu Apozentasaun ne'e, hodi kria kuadru lejislativu ida atu garante asesu ba Fundu ida ne'e ba funsionáriu públikus no sira nia famílias nia di'ak. Governu sei kontribui mós ba fundu ida ne'e, hodi garante eskema seguransa sosiál ida ba funsionáriu hotu-hotu.

Komisaun ba Funsaun Públika

Atu halo kombate hasoru partidarizmu iha Funsaun Públika, sei kria Komisasun ida komposta hosi membrus kompetentes, hili tuir lei ne'ebé sei halo, ho kompetênsia téknika no integridade atu kontribui ba reforma Funsaun Públika.

Komisaun ba Funsaun Públika sei supervizona prosesu kapasitasaun tomak ba funsionáriu Estadu nian sira, inklui profisionalizaun, étika no kódigu konduta, karreiras no promosaun ho baze iha kritérius objetivus katak, haree tuir méritu ho kompetênsia.

Diploma hirak ne'ebé Konsellu Ministrus ka Parlamentu Nasionál sei adopta, sei sai hanesan baze traballu ba Komisaun ida ne'e, ne'eb'e nia funsoens maka ne'e:

- Akonsellamentu polítiku ba Governu iha asuntos kona-ba dezvoltamentu no jestaun rekursus umanus, efisiênsia no efikásia funsaun públika;
- Defini políticas, estratégias no padroens ba reforma administrativa iha funsaun públika;
- Analiza funsoens servidores Públikus sira nian;
- Estabelese kritérius no padroens relasiona ho profisionalizmu no despolitizaun funsaun públika atu fasilita prosesu avaliaun Jestores Públikus;

- Halo estudus no estabelese política kona-ba redefinisau nívéis, kompetênsias, kualifikasoens no sistema ida-idak nian ba remunerasaun salariál, ba funsionáriu públikus sira;
- Halo rezolusoens no rezolve problemas ne'ebé relaciona ho disputas/konflitus no disiplina funsionáriu.
- Promove no asegura funsionáriu públikus sira kumpri duni kódigu konduta;
- Koordena no implementa programas formasaun no treinu ba funsionáriu públikus;
- Fó orientasaun ba Diretores Jerais (ou Sekretáriu Permanentes), diretores no Xefis Departamentu, kona-ba métodos jestaun no desenvolvimentu funsionáriu públikus relaciona ho boas práttikas iha sistema servisu ida ke di'ak.
- Asegura katak iha duni kumprimentu ba responsabilidades relaciona ho administrasaun Lei Funsau Públika;

Armonizasaun no aplikabilidade Diplomas Lejislativus

Hanesan atu kompleta Reforma ida ne'e, Governu sei harii Unidade Apoiu Jurídiku (UAJ), iha Sekretaria Estadu Konsellu Ministrus, atu fó apoiu diretu ba Prezidênsia Konsellhu Ministrus no ba Governu tomak.

Reforsu apoiu jurídiku ida ne'e sei konsentra iha Sekretaria Estadu Konsellu Ministrus i sei la impede nesiedade Ministériu ida-idak nian atu bele iha mós sira nia asesores rasik kona-ba jestaun política no administrativa loro-loron nian. Nia objetivu maka atu estimula koordenaun no interasaun entre juristas sira hotu ne'ebé servisu iha Governu nia okos, hodi rezulta lekeleis armonizadas, ne'ebé simples no fásil liu atu aplika.

2. Organizasaun Administrativa Teritóriu nian

Konstituisaun RDTL prevê katak Governu sentrál tenke reprezentadu iha nível eskaloens administrativus oioin iha Teritóriu tomak i kona-ba organizasaun teritóriál, Estadu sei respeita prinsípiu desentralizasaun Administrasaun públika.

Durante mandatu governu ne'e nian, sei hala'o nafatin projetus hirak ne'ebé hala'o tiha ona kona-ba promosaun ba Política Desentralizasaun no Governu Lokál ba Timór-Leste, tanba ne'e Governu sei:

- Dezenvolve estudus atu implementa divizaun teritóriál no ordenamentu teritóriál loloos nian;
- Kria diplomas lejislativus esensiais iha matéria ida ne'e;
- Hala'o fali estudus kona-ba opsoens oioin atu forma Governu Lokál;
- Aprofunda(hakle'an) programas ne'ebé hahú tiha ona ba Dezenvolvimentu lokál;
- Analiza rezolusoens Governu nian hori uluk, kona-ba política desentralizasaun no Governu Lokál, hodi aprende lisoens mai hosi projetus-pilotu ne'ebé implementa tiha ona no analiza halo di'ak rezultadus hosi Fundu Dezenvolvimentu Lokál no hala'o fali funsionamentu Sekretariadu Desentralizasaun, atu bele dezenvolve Kuadru Estratéjiku ba Desentralizasaun.

4. Finansas públicas

Finansas públicas hanesan kondisaun nesesária ba dezvoltimentu ekonómiku tanba prezisa jestaun ho transparênsia, rigór, verdade kona-ba domíniu kontas públicas.

Transparênsia no rigór iha despeza nuudár forma ida atu garante sustentabilidade ba kontas públicas, asegura ekonomia kompetitiva, no mós fó kredibilidade ba Estadu, perante povu no perante comunidade Internasionál.

Governu ida ne'e nia opinaun katak Finansas Públicas tenke hodi halo dezvoltimentu umanu no hamenus kiak, ne'ebé propoen kona-ba:

Transparênsia iha Kontas Públicas

- Liu hosi divulgasaun/publikasaun trimestrál kona-ba ezekusaun orsamentál, atu fornese informasoens kona-ba ezekusaun orsamentál, ho baze iha kompromisu no baze iha kaixa.
- Hadi'a akompañamentu no kontrolu ba organizmus autónomus no sektór emperezariál Estadu nian no publisitasaun kona-ba demonstrasoens financeiras;
- Dezvoltimentu sistema informasaun orsamnetál atu klarifika kona-ba despeza pública tuir fonte finansiametu, tuir estrutura despesas sektorais, tuir área no klasifikasaun despesas tuir kritérius no metodolojias ne'ebé IMF aprova tiha ona.

Agilizasaun Prosesu Ezekusaun Orsamentál

- Kriasaun normas klaras, transparentes no responsabilizadoras ba desentralizasaun ezekusaun Orsamentu Estadu nian iha nível Ministérius, Sekretarias de Estadu, no órgauns autónomus;
- Dezvolve estudus atu posibilita autonomizasaun servisus hodi implementa kontrolus financeirus no programátikus halo di'ak;
- Implementa delegasoens rejionais Ministériu Finansas nian atu jere, akompaña no facilita ezekusaun OE iha nia área atuasaun;
- Defínisaun polítika apoiu ba organizasoens naun-governamentais ho baze iha análise ba kustu/benefísiu hosi projetus ne'ebé apresenta.

Investimentu Públiku

- Elabora Planu Investimentu estratéjiku ida ho metas klaras kona-ba dezvoltimentu ekonómiku sustentável no ekilibradu Timór-Leste nian.
- Aumenta investimentu públiku iha tempu badak, ho prioridade ba projetus iha áreas infra-estruturas bázikas ne'ebé bele lori ba: hadiá populasaun nia kondisoens moris, aumenta empregu ne'ebé ho qualidade, kria kondisoens atu dezvolve inisiativa privada. Investimentu públiku hanesan prioriedade ida, liuliu kona-ba abastamentu (hatama) bee moos/hemu no eletrisidade ba servisus saneamentu báziku, sistema saúde, edukasaun no kriasaun vias(dalan, ponte) ba transporte;

- Orientasaun kona-ba despeza pública kapitál ba prazu médiu (natón) atu halo manutensaun ba *stock* kapitál ne'ebé iha hela i hanesan komplementu ba investimentu privadu iha sektóres ho interese ekonómiku estratéjiku ba Paíz (beins tranzasionáveis, turizmu nst);

Kria sistema integradu (hamutuk) ida no ekilibradu (tetu hanesan) kona-ba ajudas ho insentivus ba investimentu privadu (nasionál no estranjeiru) iha territóriu.

Política fiskál

- Substituisaun sistema diskrisionáriu/arbitráriu kona-ba atribuisaun insentivus fiskais ho diminuisaun (hamenus tiha) taixas baze ba impostus ba rendimentu;
- Hala'ó estudu no planu kona-ba sistema fiskál foun ida ke simplifikadu hodi favorese ema kiak sira, insentiva sektór privadu, investimentu estranjeiru no kria saun empregu;
- Insentivu no desenvolvimentu ba empresas kiik no médias liu hosi sistema fiskál adekuadu;
- Koordenasaun asoens ho instituisoens públicas seluk ne'ebé fó ajudas ou hasai lisensiamentu atu bele halo di'ak liután kapasidade fiskalizadora administrasaun fiskál;
- Kria saun sistema insentivus ba negósios kiik ba sistema ekonomia formál;
- Kapasitasaun ba téknikus administrasaun fiskál kona-ba sira nia funsoens fiskaliza saun no kontrolu ba kontribuintes.
- Vijilânsia metin ba tensoens potensiais ne'ebé bele perturba (estraga) ekilíbriu ekonómiku-sosiál, liu hosi utiliza saun no desenvolvimentu modelu makroekonómiku atu produz (halo) senáriu ne'ebé bele prevê (haree uluk ona) tendênsias atu bele halo rekomendasoens ho karákte korretivu.

Fundus Estraordináriu (Petróleu no Finansiamentu Externu)

- Hasai persentajen ida hosi verbas transfere hosi Fundu Petrolíferu ba Orsamentu Jerál Estadu nian ba projetus estadu nian atu hodi hamenus kiak rabat rai ou atu komplementa projetus ONGs sira nian atu kombate kiak, tanba kiak ne'e ema define hanesan “la iha possibilidade tanba la iha kapasidade, ou tanba la iha oportunidades ba indivíduus, famílias no comunidades atu hetan asesu ba kondisoens mínimas, tuir normas bázikas iha sosiedade”.
- Defínisaun regras fasilidades ba utiliza saun montantes ne'ebé transfere hosi Fundu Petrolíferu ho baze iha prioridades nasionais, kanaliza maioria fundus: Ba primeira faze atu hari infra-estruturas bázikas, liu tiha faze ida ne'e, hodi manutensaun stock capital ne'ebé iha ona no ba finansiamentu projetus ho potênsia atu hatama tan reseitas;
- Kapasitasaun ba téknikus iha Ministériu Finanzas atu bele hala'ó funsoens avaliasaun no monitorizasaun projetus investimentu nian.

Banku Sentrá

- Kria Lei orgânica Banku Sentrá nian no lejislasaun seluk tan ne'ebé importante;
- Implementa mekanizmus ba Banku sentrá belez desenvolve hanesan instituisaun ida ke metin, kredível no eficiente;
- Hahu estudus kona-ba desenvolvimentu moeda nasional.

4. Kombat ba Korrupsaun

Governu ida ne'e apostu ona atu kria Alta Autoridade ba B oia Governasaun ho poderes reais atu halo intervensaun, hodi kria kultura integridade, zelu no profesionalizmu iha Administrasaun Pública.

Medidas hirak ne'ebé Governu ne'e sei adopta maka:

- Ratifika Konvensaun anti-korrupsaun, liu hosi proposta Rezolusaun ba Parlamentu Nasionál no prepara directives ba implementasaun Konvensaun ne'e nian;
- Reajusta Lei Orgânica Gabinete Inspetór-Jerál do Estadu
- Implementa Gabinete Inspesaun iha Ministériu hotu-hotu;
- Hala'o auditorias internacionais;
- Hala'o auditorias ba sira ne'ebé uluk kaer kargus públikus, kona-ba sira nia beins;
- Estabelese mekanizmus kooperasaun entre Prokuradór Direitus Umanus i Justisa ho Prokuradór-Jerál Repúblika nian;
- Kapasita téknikus atu hala'o funsoens avaliasaun no monitorizasaun korrupsaun;
- Estabelese delegasoens deskonsentradas iha distritus atu monitoriza implementasaun servisus Estadu nian;
- Aselera prosesu kriaun Tribunal de Kontas tuir Konstituisaun RDTL;
- Kriminaliza asoens korrupsaun ho sansoens efetivas;
- Desenvolve instituisoens nasionais ba prevensaun kona-ba práttikas korrupsaun;
- Kria kódigos étika no konduta ba funsionáriu públikus hotu-hotu, i sira tenke asina kontratu /kompromisis kona-ba "lae ba korrupsaun".

Kapítulu III

Kualifikasaun ba Juventude no Desenvolvimentu rekursus Umanus Nasionais

Juventude: Forsa no futuru Nasaun nian

Ho populasaun ida ne'ebé maioria jovens (idade mesak 15 anus ba kraik mak representa 45% hosi total), Nasaun Timór nia juventude maka hanesan forsa ohin loron nian no ba futuru.

Konsidera hanesan kondisaun sosiál tranzitória, juventude apresenta nia-an hanesan segmentu intervensaun privilejiadu hosi Estadu, agora sei hanesan interface/intermédiu, tuir perspetiva transmisaun matenek no experiênsia, hodi antesipa modernizasaun hosi

parte ida i hosi parte seluk, prezerva no konsolida valores fundamentais Nasaun Timór nian.

Estadu simu papél primordiál atu hanoin kona-ba nesesidades no aspirasoens no ba maximizasaun potencialidades juventude sira nian, hanesan atór interventivu no alvu privilejiadu iha dezenvolvimentu. Estadu hamutuk ho atores seluk no parseirus sira, iha nível lokál, rejionál, nasional – iha Paíz ne'e no diáspora – i internasionál, tenke garante envolvimentu ativu juventude iha sektore atividade hotu-hotu, atu promove jovens sira hodi simu sira nia responsabilidades, nuudár protagonistas prinsipais ba sira nia futuru rasik.

Tau Juventude hanesan Sentru Atensaun iha Polikas Públikas

Juventude maka hanesan rekursu umanu prinsipál iha Paíz ne'e, i garante atu harii Nasaun Timór ho hanesan mós forsa motriz iha luta kontra pobreza (kiak) hodi hala'o dezenvolvimentu sustentável ba Timór-Leste.

Tuir perspetiva ida ne'e, Governu sei orienta nia asoens atu buka halakon tebes duni, problemas boot hirak ne'ebé afeta Juventude timorens.

Ba ida ne'e, Governu sei implementa Polítika ida ba juventude sira, ne'ebé sei abranjente, koerente, transversál (tanba multi-sektorial) no pragmátika, hodi halo uluk kedas esforsu atu hatama alterasoens kualitativas no kuantitativas ne'ebé kle'an iha domínus estruturantes ba jovens sira nia bein-estar ho futuru, hanesan – problemátika Edukasaun, Formasaun no Empregu; Artes no Kultura; Desportu no Okupasaun ba Tempus Livres (halimar nian).

Hanesan sektór transversál, juventude sei sai nafatin hanesan preokupasaun ba diversus sektore governu nian.

Atu fasilita kualifikasaun umana no sosiál jovens sira, Governu prontu atu:

- Propoen alternativas espesífikas ba formasaun no kualifikasaun profisionál atu bele hetan empregu;
- Sujere alternativas atu habelar no hadi'a sistema asaun sosiál (bolsas estudu, fatin hela ba jovens sira, facilidade transporte), hanesan forma partisipasaun ida atu kombate situasaun ne'ebé ema labele eskola no hanesan insentivu atu dudu ema atu eskola nafatin;
- Fomenta universalizasaun kona-ba teknolojias informasaun foun iha jovens sira nia leet;
- Promove implementasaun medidas prátikas ba reintegrasaun jovens sira ne'ebé iha risku no prevensaun ba delinkuênsia/kريمة juvenil, liuliu grupus artes marsiais no gangs ne'ebé sistemátikamente provoka instabilidade iha Paíz laran.
- Fomenta asociativizmu hanesan espasu/fatin ba sosializasaun no aprendijazen demokrátika, hodi kontribui ba partisipasaun réal iha prosesu atu foti desizoens iha Paíz ne'e.

- Fó apoius no insentivus finanseirus, téknikus, materiais no lojístikus ba atividades ne'ebé grupus ka asosiasoens juvenis sira halo hela, bazeia ba kritérius objetivus ne'ebé define tiha ona.
- Promove no ezejuta, iha territóriu nasionál tomak, no servisu hamutuk ho asosiasoens juvenis sira, podér lokál no instituisoens relijiozas, programas atu oinsá jovens sira bele okupa sira nia tempus livres (halimar nian).
- Inkrementa/dezenvolve programas interkâmbiu lokál, nasionál no internasionál, hodi envolve asosiasoens no grupus juvenis, partikularmente ho Timór-sira iha diáspora no CPLP
- Promove voluntariadu juvenil, fó liu atensaun ba áreas saneamentu báziku, prezervasaun ambiente no patrimóniu kulturál no konstrusaun infra-estruturas kulturais i rekreativas (Sentrus Komunitáriu).;
- Insentiva kompetitividade ne'ebé di'ak, hanesan hala'o prátikas desportivas, expoziisoens jovens sira ne'ebé kriadores, iha nível nasionál no internasionál, no fó prémios ba méritu;

1. Edukasaun

Iha Timór-Leste, dezde indepenênsia nasionál to'o agora, polítikas kona ba edukasaun hatudu ona katak halo duni asoens barak atu hadi'a no transforma sistema edukativu ne'ebé hetan hosi tinan 24 okupasaun Indonézia.

Ho tulun maka'as hosi li'ur, hanesan ajuda portugeza ba Dezenvolvimentu, halo duni ona esforsus boot atu hanorin Portugêz, ne'ebé hamutuk ho Tetum, sai hanesan línguas ofisiais Paíz ne'e nian.

Igreja Katólíka iha Timór-Leste, desde uluk kedas, hanesan parseiru prinsipál ne'ebé simu mós responsabilidades edukativas, hodi bá to'o iha fatin hirak ne'ebé estrutura edukativa sira seluk seidak iha.

Ajuda multilateral hosi parseiru sira, kontribui mós ba evolusoens signifíkativas iha tinan hirak ne'e laran, i ita bele haree hosi nível eskolariedade populasaun Timór ne'ebé sa'e aas.

Maibé sei iha nafatin disfunsoens, konstranjimentus (impedimentus) no lakunas (buat ne'ebé falta) hanesan:

- La iha polítikas klaras no prátikas konsistentes kona-ba labarik kiik liu no sira idade pre-eskolár.
- Asimétrias (la la'o loos) lokais no sosiais iha asesu ba edukasaun, haree ba kobertura no qualidade oferta ba eskolariedade obrigatória, liuliu iha zonas rurais;
- Parke skolár ne'ebé aat ona ho prejuízu ba eskolariedade obrigatória, ho mós distorsoens geográfikas i problemas salubridade (ijiene) i la adekuaudu ba objetivus pedagójikus (la iha fatin ba prátika desportu skolár, edukasaun fízika, edukasaun teknolójika nst.)

- Defisiênsia no insufisiênsia mekanizmus, dispozitivus no estruturas akompañamentu no supervizaun ba sistema edukativu;
- Persepsaun (hanoin) ne'ebé sei sala nafatin no la fó valór ba ensinu tékniku;
- La implementa didi'ak ensinu tékniku no falta artikulasaun ho sistema formasaun profisionál;
- Rekursus umanus ho kualidade mós la to'o atu hanorin no mos ba funsoens jestaun, planifikasaun no supervizaun ba sistema edukativu;
- Desentralizasaun di'ak ida ba servisu rejionais edukasaun nian no hala'o didi'ak administrasaun, formasaun profesores, bibliotekas/sentrus rekursus, orsamentu no inspesaun eskolár, hodi halo koordinasaun ho polítika nasional ba dezvoltimentu edukativu;
- Falta polítika ida ke klara kona-ba papél língua ensinu hanesan fatór primordiál ba unidade nasional.
- La iha Lei ba Bazes sistema edukativu no lejislasaun seluk tan atu regula sistema edukativu báziku, sekundáriu no superiór;
- La iha facilidades no kondisoens ba pesoál dosente (mestres/profesores sira) iha áreas rurais (la'ós sidade).
- La iha polítika formasaun ba profesóres ne'ebé bele gia/orienta formasaun tomak, ho perspektiva katak tenke iha formasaun kontínua (nafatin) ba profesóres sira.

Iha kontextu ida ne'e, Governu propoen atu dezvoltolve programas melloria ba kualidade no ekuidade iha edukasaun, hodi adopta prinsípius orientadores hanesan ne'e:

- Kualidade, katak foka liu ba prosesu no rezultadus aprendizajen;
- Ekuidade, katak tenke iha sensibilidade institucionál kona-ba diferensas lokais no sosiais iha asesu ba edukasaun, hodi fó atensaun espesiál ba rejioens no grupus sosiais menus favoresidus;
- Pertinênsia sosiál no ekonómika atu hodi buka nafatin gañus sosiais no ekonómikus ba Timór-Leste na ba Timór-oan sira.
- Kompartisipasaun hosi famílias sira iha jestaun no foti desizoens;
- Parseria sosiál, katak liu hosi inisiativas privadas iha níveis ensinu hotu-hotu, inklui ensinu superiór, hosi perspetiva planifikasaun i koordinasaun ba polítika edukativa.

Mezmuke la hakarak substitui/troka no limita fali intervensaun Estadu hanesan promotór edukasaun, Governu konsidera impresindível/importante papél parseirus seluk sira nian, hanesan Igreja, ONGs ba promosaun ensinu privadu alternativu ba ensinu públiku.

Atu bele halo modernizasaun sistema, bazeia ba prinsípius ne'ebé define iha leten, presiza, durante Lejislatura ne'e, dezvoltolve estudus, avalia opsoens programátikas no dezvoltolve senáriuus alternativus ne'ebé permite halo lansamentu bazes Programa Nasionál ba Dezvoltimentu Rekursus Umanus, liu hosi diálogu permanente ho sociedade no atores sosiais sira seluk, hodi evita deskoordinasaun intervensoens no pugna/defende orientasoens klaras no tendentes ba uniformizasaun ba programas edukativus ho língua nasional ida ne'ebé bele hanesan vektór/meiu ida atu hametin unidade Timór-oan tomak.

Neineik, Governu sei kria kondisoens atu kapasita pesoál dosente iha eskolas, abilita sira atu hala' o knaar todan hanesan eduka no fahe matenek no valores ho perspetiva atu integra iha merkadu no edukasaun atu bele repeita malu ho halo buat ruma ba ema hotu nia di' ak.

Ensinu Báziku

Aleinde halo konsolidasaun ba inovasoens ne' ebé foin hatama iha nível ensin u ida ne' e, Governu nia esforsus sei orienta atu hadi' a kualidade pedagójika, hamenus asimetrias geográfikas no sosiais atu hetan asesu, i atu kontempla mós dezvoltimentu kona-ba ema nia atitudes, valores, komportamentus, kapasidades, aptidoens no koñesimentus téknikus.

Objetivu sentráal atu hala' o maka promosaun no inkrementu kualidade. Aleinde objetivu estratéjiku ida ne' e, Governu halo programa atu:

- Halo reekuasionamentu (estuda halo di' ak fali) problemátika lian ofisiál ba ensin u no mós atu hanorin línguas sira seluk, inklui línguas nasionais, i Inglês ou Indonéziu hanesan lian traballu.
- Hadi' a no reforsa parke eskolár, liu hosi asoens manutensaun preventiva, rekuperasun no apetrexamentu ba eskolas ho materiál ne' ebé bele adapta ba projetu pedagójiku,
- Fortalesimentu ba polítika maior retensaun (hamenus absentizmu eskolár) no promosaun iha ensin u báziku, ne' ebé tuir loloos labarik sira lalika selu.
- Kriasaun kondisoens institusionais, pedagójikas no akadémikas ne' ebé hamosu kuadrus kualifikadus iha jestaun, koordenasaun pedagójika no investigasaun aplikada, iha nível ensin u báziku nian; ho medida ida ne' e sei halo kriasaun sistemas atu fó insentivus hanesan (promosoens, formasoens, pagamentus) ne' ebé sei kontribui atu hamenus absentizmu (falta eskola), violênsia iha eskola ou komportamentus diskriminatórius ho orijen iha jêneru (feto) tipu étniku ka klase sosiál;
- Sei dezvoltolve mós estudus viabilidade no hala' o esforsus atu aumenta eskolariedade obrigatória, observânsia (kaer metin ba) parâmetrus hanesan kualidade, ekuidade no sustentabilidade finanseira.

Ensinu Sekundáriu

Tendensia atu halo universalizasaun ba ensin u báziku provoka duni krezimentu ensin u sekundáriu, ne' ebé nia objetivu prinsipál maka atu kontinua de' it estudus.

Konsidera katak iha nível ensin u ida ne' e tenke fó liu importânsia atu hetan téknikas aprendijajen (aprende atu hatene) hamutuk ho baze forti iha línguas/lian, iha teknolojias no siênsias, atu bele hala' o edukasaun jerál ida ho kualidade no padraun kurrikulár komun.

Governu propoen mós atu kria kondisoens atu halo artikulasaun di'ak liu entre Ensinu Sekundáriu Jerál ho ensinu Tékniku ho Formasaun Profisionál.

Programas ba formasaun komplementár no profisionalizante sei implementa ho kolaborasaun ho sistema formasaun profisionál no parseria ho mundu empreatória.

Ne'ebé hanesan prioriedade ida maka tenke hanoin di'ak fali kona-ba ensinu tékniku relasiona ho formasaun/empreatória. Iha asaun edukativa tenke hanorin valores no prinsípius sosiais kona-ba dignifikasaun no valorizasaun sosiál ba traballu manuál ho tékniku.

Liña orientadora hosi Programa Governu nian ida ba sektór ida ne'e, relasiona ho valorizasaun sientífika no profisionál ba karreira dosente, ne'ebé sei liu hosi implementasaun kapasitasaun no sistemas formasaun, akompañamentu no avaliaasaun ba dosentes sira nia formasaun.

Prevê katak atu lansa fali dispozitivus ba orientasaun eskolár no profisionál atu apoia estudantes sira ho informasoens klaras hodi fasilita sira halo eskollas no opsoens formasaun nian (sekundáriu jerál ou tékniku profisionál ou superior).

Apoiu sosiu-educativu

Demokratisidade ida ne'ebé efetiva iha sistema edukativu, ne'ebé garante iguallade oportunitades atu hetan asesu no susessu eskolár, tenke liu hosi introdusaun medidas kompensasaun ba situasaun sosio-ekonómika ne'ebé aat ona hosi famílias labarik barak ne'ebé tinan to'o ona atu eskola.

Enkuadra iha polítika jeneralizasaun ba edukasaun baze no reforsu ba ensinu pre-eskolár, mak asaun sosiál eskolár hodi buka hadi'a kualidade sistema edukativu, aumenta kapasidade aprendijajen ba estudantes sira no kontribui atu hetan oportunitades hanesan ba asesu no susesu ba alunus sira ne'ebé prezisa liu/kiak liu.

Servisu asaun sosiál eskolár sei hala'o liu hosi asoens lubun ida ne'ebé hala'o hamutuk, hanesan kompartisipasaun iha refeisoens, servisu iha kantina, transportes, manuais no materiál eskolár, fó bolsas estudu no programa saúde eskolár ida ba alunus sira be kiak liu.

Atu hala'o programa hodi reforsa asaun sosiál eskolár nian, tenke konsidera valorizasaun ba dotasoens financeiras (osan ne'ebé iha) atu reforsa atuasaun Igreja no ONGs hodi nune'e sira bele atende prioridades ne'ebé estabesele ona.

Sei avalia fali kritérius kona-ba Bolsas Estudus ne'ebé fó ona i durante tinan rua mai ne'e Governu kompromete-an atu kria solusaun ida ba problema ida ne'e.

Estuda possibilidade atu oinsá alunus sira lalika selu propinas iha Universidade no eskolas, atu ema bele la abandona (husik) eskola.

Ensinu Superior

Agora, mais duke nunka, siênsia ho nia aplikasoens, umanidades no investigasaun aplikada, ejize katak tenke iha ensinu superiór ho kualidade ne'ebé tama iha redes universitáriu internasionais no espasus ensinu seluk tán.

Planeamentu estratéjiku ensinu superiór tuir lójika dezvoltamentu presupoen levantamentu aturadu no rigorozu ba nesesidades Paíz kona-ba rekursus umanus.

Iha universidades barak iha Dili, embora sira sei prezisa tebes atu preenxe kondisoens lubuk ida haree aspetu pedagójiku, jurídiku-institusionál no pesoál kualifikadu atu bele funsiona halo di'ak, tuir formasaun universitária ne'ebé iha kualidade.

Universidade Nasionál Timór-Leste tenke sai hanesan koluna-vertikál ba sistema produsaun no divulgasaun sabér (matenek) sientífiku no teknolójiku atu nune'e bele servi ba sektór produtivu no dezvoltamentu Paíz.

Govenu ida ne'e, propoen atu analiza ho kle'an tebes hodi kria mekanizmus kontrolu hasoru proliferasaun (barak demais) universidades privadas ne'ebé la garante níveis kualidade ne'ebé prezisa hetan, i karun liu ba famílias sira, no hodi kria expetativas ne'ebé falsu kona-ba empregue ba jovens sira.

Relasiona ho ensinu superiór iha estranjeiru, Governu propen atu analiza rezultadus akadémikus no kualidade moris ba estudantes sira iha li'ur, hodi hatene mós oinsá organiza no selu sira nia estudus, atu bele define no negosia akordus foun ho universidades ne'ebé simu sira hodi optimiza relasoens entre kustu ho efikásia.

Jeneraliza Progresivamente (neineik) edukasaun ba labarik no jovens sira iha comunidades

Promove iha nível sukus, hosi artikulasaun ho sistema edukativu ne'ebé simu apoio husi telekomunikasoens, klubes hodi aprendijajen boas práttikas – Sentrus Komunitáriu – iha área ambientál, iha alimentasaun (hahán), ijiene no saúde públika, no inisiativas seluk ba formasaun sidadania.

Ensinu Báziku ba Adultus: Kapitalizasaun sosiál ba sira ne'ebé la tama iha sistema formál

Sub-sistema extra-eskolár nia domínium maka edukasaun baze ba adultus liuliu ba sira ne'ebé tinan 15 to' 35. Ensinu Báziku ba Adultus sei sai hanesan kontributu ida ba universalizasaun edukasaun baze, hodi artíkula konteúdu aprendijajen eskolár ho formasaun profisionál no animasaun komunitária.

Hasa'e nível kulturál no eskolár populasaun adulta nian, ne'e hanesan aposta ida iha formasaun profisionál ho potensia atu hatama alfabetizadus sira iha vida sosiál no ekonómika.

2. Formasaun Profisionál no Empregu

Hadia' kondisoens moris, ne'e mós hanesan objetivu permanente ida hosi kualker Governu ne'ebé preokupa ho bein-estar populasoens, maibé labele halo buat ida karik la konsege hatún uluk taixa dezempregu.

Fenómenu sosiál todan ida ne'e, iha ita nia Paíz , ho tiha ona karáter estruturál, ne'ebé labele kombat ho asoens pontuais. Pelu kontráriu atu hetan solusaun naruk ba problema dezempregu tenke liu lai hosi kreximentu ekonómiku ne'ebé bele loke empregu no aumenta produsaun nasionál.

Tanba ne'e objetivu “empregu” hanesan objetivu estratéjiku ida ba Governu, tanba relasiona ho atuasaun konsertada ba polítikas makro-ekonómikas, sektorais, dezenvolvimentu rejionál, edukasaun no formasaun. Kreximentu investimentu produtivu, liuliu privadu, nasionál no estranjeiru, hanesan mola atu dezbloqueia problema dezempregu.

Formasaun profisionál, karik implementa halo di'ak, bele kontribui atu diminui dezempregu, tanba la'ós segredu katak hosi parte ida iha dezempregu masivu (barak tebes) maibé hosi parte seluk la iha ema profisionais atu servisu iha áreas importantes ba dezenvolvimentu Paíz. Embora halo duni ona esforsu balu iha domínio ida ne'e, sei namkari hela i la orienta ho formasaun atualizada kona-ba nesetidades efetivas merkadu nian, ba tempu agora no ba futuro.

Formasaun atu hetan empregu ne'e asaun importante ida. Formasaun atu asegura adekuasaun (natón lós) ho postus traballu ne'ebé iha ou sei kria, hanesan mós formasaun ba auto-empregu no promosaun ba mikro-empresas.

Hanesan elementu ida ba política valorizasaun no nia artikulasaun, koordenasaun ho merkadu traballu hanesan eixu fundamental no krítiku ida. Ekilíbriu entre ofertas ba formasaun no prokuras hosi merkadu sei ajuda utiliza di'ak liu no ho efisiênsia rekursus formativos Paíz ne'e nian.

Governu prekoniza konstrusaun progresiva ba sistema formasaun ida ke bele haburas lójika formasaun ba ema nia moris tomak no kontribui ba dezenvolvimentu profisionál no kulturál populaun nian. Sei kombat proliferasaun universiadades privadas, ne'ebé la tuir padroens qualidade ba ensinu no aposta, nudar alternativa, ba Formasaun Profisionál Orientada, ne'ebé kapasita duni jovens sira.

Medidas Komplementares ne'ebé hatama iha Programa Governu nian maka hanesan:

- Insentivu ba formasaun profisionál ba auto-empregu no promosaun programas ne'ebé bele fó empregu ba grupus desfavoresidus iha merkadu traballu, hanesan jovens sira be foin eskola hotu, ema ne'ebé dezempregadus kleur ona no fetu sira;
- Promove parseries entre utilizadores ho fazedores informasaun, ida ne'e hanesan hadi'a servisus ne'ebé Administrasaun presta ba sidadaun, hodi estabesele no

dezenvolve sistema informasaun ida ke di'ak liu kona-ba merkadu traballu no empregu;

- Avalia oferta formasaun ne'ebé iha, taka instituisoens (Sentrus Formasaun) ne'ebé la hala'o sira nia funsaun no hala'o planu definisaun padroens kona-ba kompetênsia, no sertifikasaun, kolabora hamutuk ho parseirus desenvolvimentu i konkretu liu ho OIT, hanesan ajênsia espesializada iha domíniu ida ne'e;
- Hadi'a qualidade sentrus formasaun profisionál no inkrementa asoens formasaun profisionál ne'ebé bele ajusta liu ho nesesidades desenvolvimentu iha zonas rurais (ex. Téknikas agríkolos, peskas no téknikas prosesamentu peskadu, produsaun florestál no arborikultura; kriasaun gadu nst.).
- Reabilita no habelar rede Sentrus Formasaun Profisionál
- Haree di'ak fali kríkulu formasaun profisionál hodi hatama abordajens foun ba ensinu, formasaun modulár no formasaun bazeia ba padroens kompetênsias, atu hetan formasaun ida ke relevante no ajustada liu ho nesesidades merkadu traballu;
- Promove artikulasaun entre sistema formál edukasaun nian no formasaun profisionál ba empregu;
- Promove partisipasaun parseirus privadus sira iha oferta kona-ba kursus formasaun profisionál;
- Promove apoiu integradu ne'ebé adapta ba tipus empresas kiik ka natón ne'ebé la hanesan, no sira nia kapasidade atu jera/loke empregus, hanesan fó insentivus hodi fasilita prosesu ba nia kriasaun no disponibilizasaun instrumentus finanseirus ne'ebé bele adapta liu ba nesesidades.
- Promove insentivus ba kriasaun postus traballu ne'ebé rekere/presiza kualifikasoens no investimentus kiik hosi: i) Fó kreditus ba finansimentu projetus kiik. ii) Promosaun no desenvolvimentu mikro-empresas no atividades ne'eb'e bele hetan rendimentu, bazeia ba kritéirus rentabilidade ne'ebé garante nia sustentabilidade no iii) Promosaun empregu temporáriu, liu hosi reabilitasaun infra-estruturas iha nível rurál (prédisu públikus, estradas nst.) hodi uza "sistema maun-de-obra barak" ho baze iha utilizasaun maun-de-obra ne'ebé hodi limita uza mákinas;
- Fomenta integrasaun kuadrus superiores no médius iha empresas.
- Fó bolsas Estudus ba estudantes iha kursus formasaun profisionál iha estranjeiru, liuliu sira ne'ebé iha Filipina ho Indonézia;
- Aprofunda medidas lejislativas relasiona ho formasaun profisionál no empregu, nune'e mós aperfeisoa (hadi'a) funsionamentu departamentus estatais ne'ebé harii atu hamenus dezempregu.

Atu habadak, dezempeñu aparelu formativu no merkadu traballu tenke haree iha kontektu ida de'it.

Atu halo manutensaun no aperfeisoamentu relasoens traballu, Governu sei la haluha medidas enkorajadoras kona-ba protesaun traballu ne'ebé iha ona, ho promosaun kultura ida orienta ba traballu no bazeia ba Konvensoens Internasionais. Nune'e, konkretu liu, sei hala'o medidas lubuk ida atu:

- Halo promosaun ba edukasaun traballadores no empregadores sira kona-ba relasoens traballu;
- Aprovasaun Kódigu Traballu atu aktualiza traballadores sira nia direitus;
- Ratifikasaun Konvensoens Internasionais kona-ba Traballu – hanesan OIT nian – relasiona ho *traballu forsadu no formas traballu ba labarik sira ne'ebé aat liu hotu*, atu neineik bele atinje patamares traballu desente (di'ak nian) ba traballadores timór-oan hotu.

4. Artes ho Kultura

Governu ida ne'e sei tau kultura hanesan afirmasaun Nasaun no Estadu Timór nian.

Iha época/tempu ne'ebé ita moris daudaun ne'e, iha globalizasaun nia laran, bele dehan katak hanesan ona sensu komun, bainhira ita fiar katak prezervasaun identidades kulturais povu no comunidades sira nian bele kontribui atu salvaguarda sira nia identidade rasik, liuliu sira ne'ebé atrazadu liu i la dún iha pezu/influênsia iha **Nasoens sira seluk nia leet.**

La tau ketak tiha formas afirmasaun nasional seluk, ne'ebé mesak neserías, Governu fiar katak tenke liu duni hosi kultura maka Timór-Leste bele tau-an iha fatin, ne'ebé tenke prezerva, haburas no salvaguarda nia identidade, maibé labele taka-an ba modernidade.

Protesaun ba Kultura asegura perenidade (buat ne'ebe tahan kleur) no transmisaun hosi jersaun ba jersaun, kona-ba legadu istóriu, etnográfiku hosi ita nia bei-ala sira no ba to'o konkistas, realizasoens no valores kontemporâneos.

Kultura hanesan instrumentu promosaun ba ita nia konsiênsia patriótika, reforsu ba unidade nasional, ezaltasaun ba sentimentus pertensa no referênsia importante atu hakerek no materializa programas atu hodi hadi'a sidadauns sira nia qualidade moris no desenvolvimentu Paíz.

Iha kontextu ida ne'e, Governu bazeia ba prinsípiu estabelesimentu responsabilidades Estadu nian, koordenasaun no armonizasaun inisiativas hosi intervenientes oioin iha atividade kulturál, hodi destaka nia papél hanesan fasilidór ba asoens kulturais.

Objetivus fundamentais iha área Kultura maka:

- Promove valores kulturais ne'ebé kontribui ba hametin paz no konstrusaun Nasaun Timór.
- Promove koñesimentu no divulgasaun kultura iha planu nasional ho internasionál;
- Apoia desenvolvimentu turizmu kulturál no inisiativas privadas atu halo investimentu no patrimóniu kulturál i artístiku;

- Inkrementa kooperasaun no interkâmbiu kulturál ho Países CPLP – tanba ho sira maka Timór-Leste partilla/hetan hamutuk legadu istóriku kulturál – no mos ho Países viziñus.

Língua/lian: Promove no valoriza komunikasaun

Kona-ba língua, Governu sei aprofunda polítika promosaun no valorizasaun ba Tetum. Hamutuk no atu salvaguarda Lian ofisiais rua, sei hola medidas atu Paíz ne'e, neineik bele iha Lian rua.

Investigasaun Kulturál

Reforsa investigasaun buat ida ke Governu sei la haluha. Istória, tradisoens orais, literatura, antropolojia, sosiolojia, linguística, múzika no áreas seluk tan siênsia umanas no sosiais nian, sei hanesan áreas investigasaun i sei reforsa liután.

Governu atu fó prioriedade ba produsaun no divulgasaun Istória Rezistênsia timorense nian no mos jesta istórica ita nia povu nian iha luta ba libertasaun Pátria.

Komunikasaun Sosiál atu serve ba kultura

Tenke uza liu meius komunikasaun atu hodi proteje no divulga kultura no tradisoens, tuir arte oioin, hanesan teatru, dansa, múzika no gastronomia (hahán).

Sei promove criatividadee ba artes plásticas, artezenatu no audio-vizuál.

Governu, iha kontextu promosaun no dinamizasaun kulturál, tenke fó atensaun liu ba áreas hirak ne'e, atu hodi promove ábitus kulturais entre timór-oan sira, hodi sira bele sente prazér husi kontemplasaun estétika.

Atu hetan objetivu ida ne'e propoen atu:

- Dezenvolve asoens promosaun artes plásticas, hanesan reforsu kapasidades, liu hosi formasaun iha Paíz no iha Estranjeiru; apoiu ba realizasaun manifestasoens ou expozisoens fixas no itinerantes (hodi la'o); no elaborasaun estudus viabilidade téknika no finanseira, atu hodi loke Eskola Artes no Ofísius;
- Promove feiras ba artezenatu iha Paíz no apoia partisipasaun artezoens nasionais sira iha sertames (konkursus) internasionais; estabelese artikulasau forti ida entre sektore artezenatu no turizmu; kontribui atu rekupera fali formas téknikas tradisionais no hatama tan téknikas foun; mobiliza no responsabiliza artezauns sira atu kria kondisoens ke bele konsilia (halibur) dimensoens artístikas no ekonómikas artezenatu nian.
- Hala'o estudus baze no viabilidade téknika no finanseira atu hala'o inisiativa hodi kria sentru ou dispozitivus formasaun no produsaun audio-vizuál, hodi haree ba merkadu nasionál no mós merkadu Países CPLP no Países viziñus iha rejiaun.

Diplomasia kulturál

Iha nível kulturál, kultura tenke hanesan Paíz nia ilas/oin, hodi kontribui atu evita jerasoens timór-an sira iha diáspora lakon sira nia abut/identidade.

Ba ida ne'e, presiza dezenvolve "Diplomasia kulturál" liu hosi redimensionamentu ba ita nia representasoens diplomátikas no konsulares, hodi fó ba sira meius atu halo promosaun kultura, halo parseria ho asosiasoens timór nian namkari iha mundu.

4.Desportu

Desportu hamutuk ho kultura tenke hanesan faktór kongregasaun ba juventude no promosaun koezaun sosiál.

Hanesan atividade sosiál kreativa desportu bele fomenta konvíviu, kooperasaun no kompetisaun dia'k nian entre membrus komunidadde tomak. Nia iha valór boot ba sosializasaun no edukasaun ba ema ne'ebé pratika no kontribui atu hametin amizade entre povus.

Desportu, hamutuk ho kultura bele ajuda sosializasaun Ema nian, kontribui atu aumenta autu-estima timór-oan sira, promove Kultura Paz, Unidade Nasionál no Koezaun Sosiál.

Kontribui atu hadi'a ema sira ne'ebé pratika nia kualidade moris, ba dezenvolvimentu integrál no bein-estár ida-idak nian.

Governu halo kompromisus hanesan ne'e, atu promove prátikas desportivas ne'ebé di'ak liu nian:

- Reforsu ba valensia(valór) edukativa, rekreativa no kulturál desportu nian, hamutuk ho polítikas edukasaun, saúde no juventude;
- Hatama/reforsa kritérius ekuidade iha intervensaun Estadu, atu hamenus dezigualdades lokais no rejionais ne'ebé iha ona atu iha asesu ba prátikas desportu;
- Promosaun diálogu, toleransia no étika iha atividades desportivas;
- Formasaun no kapasitasaun rekursus umanus (dirijentes, treinadores no ajentes desportivus seluk tan).
- Kriasaun/rekuperasaun infra-estruturas desportivas ho objetivu atu fasilita asesu ba pratika desportiva;
- Promosaun asociativizmu no interkâmbius;
- Dezenvolvimentu inisiativas fó formasaun desportivas ba jovens atletas sira, hanesan estratéjia rekuperasun ba labarik no jovens iha situasaun risku sosiál no familiár.
- Universalizasaun ba desportu eskolár, ne'ebé merese atensaun, hanesan elementu importante ba dezenvolvimentu fíziku no psikolójiku estudantes sira nian;
- Reforsu ba formasaun kuadrus iha edukasaun fízika no desportu;

- Halo programa integradu ba dezvoltimentu desportu nasional ho envolvimentu eskolas, atletas , klubas/asosiasoens, organizasoens reprezentativas (Komité Olímpiku) no empresas privadas;
- Estabelese kriterius rekoñesimentu dessportistas sira, individualidades no instituisoens ne'ebé tanba sira nia servisu, sira bele foti desportu no Paíz;
- Promove kriasaun núkleus desportivos iha eskolas, sukus, aldeias, fatin servisu no unidades Forsas Defeza no Seguransa, tuir koordenasaun ne'ebé diak;
- Promove festivais Eskolares, torneius no atividades desportivas seluk tan, atu hodi okupa tempu livre no deskobre talentus desportivos;
- Promove peskiza, divulgasaun no prátika jogus tradisionais;
- Estimula atu halo programas kooperasaun no interkâmbiu desportivo, hodi hametin relasoens amizade no solidariedade, no fó atensaun espesial atu hametin liután relasoens ho Paízes CPLP no Paízes iha rejiaun;
- Kria lejislasaun kona-ba dezvoltimentu desportu iha Paíz.

Kapítulu IV

Solidariedade, Saúde no Protesaun Sosiál iha Kombate hasoru Pobreza (kiak)

Timór-Leste prezisa nia oan sira hotu, la iha exepasaun nein eksluzaun.

Tanba ne'e, Governu propoen atu implementa política sosiál pública espesífika ida, ne'ebé orienta ba liu kamadas vulneráveis iha populasun leet no tau hanesan objetivu fundamentál envolvimentu kamada ida ne'e iha definisaun políticas hirak ne'e.

Envolvimentu ida ne'e no partisipasaun beneficiários sira sei hanesan garantia ba sira atu sai tiha, ho esforsu rasik no ba tempo naruk, hosi sira nia kondisaun vulnerável ne'e.

Governu ida ne'e sei dezvoltolve programas atu fó subsidiu ba ema kiak no vulneráveis sira, hodi bele kontribui atu aumenta ekuidade sosiál, no materialmente, ba formasaun kapitál umanu, esensial ba dezvoltimentu sustentável.

Iha âmbito ida ne'e, sei hatama programas atu kombate dezempregu ba jovens sira (ex. Kria sentrus komunitárisu), fó pensoens ba antigus kombatentes libertasaun nasional, ba ferik/katuas sira, defisientes no sira ne'ebé pertense ba kamadas vulneráveis iha populasun Timór laran. Governu sei konsidera dezvoltimentu projetus-pilotu, atu halo "transferensia osan kondisionál", iha área saúde no edukasaun ba famílias sira be kiak liu, hanesan halo ona iha Paízes seluk ho susesu.

Organizasoens sosiedade sivil

Hamutuk ho política espesífika ida ne'e Governu propoen abordajen multidimensional ida kona ba kiak no eksluzaun, ne'ebé la'ós de'it bele promove formas kolaborasaun entre servisu públikus oioin, maibé bele susita(atrai) mós envolvimentu sosiedade sivil, hanesan organizasoens ne'ebé besik liu ema kiak sira, hanesan Igreja ho ONGs sira.

Governu rekoñese katak ONG no organizaasoens sosiedade sivíl bele fasilita kombinasoens kreativas, haree ba partikulariedades lokais no mobilizasun ajentes lokais, ho kapasidade boot liu atu asume prosekusaun (implementasaun) estratéjias ba luta hasoru kiak no eksluzaun.

Konsolidasaun nosaun kona-ba parseria entre Estadu, Igreja no organizaasoens sosiedade sivíl bele loke oportunidades ba asaun artikulada ida, ne'ebé la estraga fali funsaun reguladora Estadu nian.

Tanba ne'e maka Governu hakarak:

- Estabelese politikas, estratéjias no metodolojias atu halo parserias hodi halo kooperasaun entre Igreja, organizaasoens sosiedade sivíl no Governu.;
- Kria kondisoens ba reforsu institusionál organizaasoens sosiedade sivíl nian;
- Estabelese mekanismus atu halo diálogu no konsulta permanente, iha perspetiva koordenaun intervensoens laran;
- Kria plataforma konsertasaun ba intervensaun ajentes oioin, hanesan Estadu, Igreja, sosiedade sivíl no organizmus internasionais, tantu iha nível polítikas komu iha nível estratéjias, atu bele halo di'ak liután koordenaun no jestaun ba reskursus ne'ebé iha.

1.Saúde.

Saúde hanesan mós edukasaun, kontribui ba formasaun, expansaun no prezervasaun kapasidade umana.

Governo sei implementa Planu Estratéjiku Nasionál ba Saúde ho prioridades hanesan:

- Hadi'a asesu no prokura atu hetan kuidadus ba saúde ho qualidade atu bele atinje objetivus tuir Dezenvolvimentu Miléniu (MDG) hodi foka ba redusaun taixas aas iha Mortalidade Infantíl no Maternál no kombate ba moras ne'ebé da'et, hanesan malaria, dengue no tuberkuloze.
- Fortalesimentu (hametin) jestaun no sistemas apoiu, ho atensaun espesiál ba dezenvolvimentu Rekursus Umanus.
- Fortalesimentu koordenaun, planeamentu, akompañamentu no avaliasaun servिसus saúde nian;
- Garante servिसus bázikus saúde ba ema hotu i iha Paíz tomak.
- Haree di'ak fali no aprova lejislasaun ba sektór saúde.
- Dezenvolve, lejisla no supervizona atividades farmaseutikas;
- Garante asistênsia médika no aimoruk ba labarik sira hotu, ne'ebé foin moris;
- Estabelese programa vasinasaun iha nível nasional, tuir óptika saúde preventiva;
- Dezenvolve polítikas transversais ne'ebé iha implikasaun ba área saúde umana hanesan: Konservasaun ambientál, kontrolu sanitáriu ba produsus, programas edukativus ba saúde, programas kombate ba moras mai hosi animais; programas nutrisionais; programas ba aimoruk;

- Rekuperasaun no kriasaun infra-estruturas saúde, hanesan ospitais no sentrus saúde, iha nível nasional.

Servisus saúde sei orienta tuir valores fundamentais hanesan: direitu ba saúde, ekuidade, ho atensaun espesial ba segmentus ne'ebé kiak liu, sensibilidade kultural, solidariedade no amizade.

Governu, ne'ebé ho Organizasaun Mundiál ba Saúde komunga hamutuk konseitu Saúde katak “ estadu ne'ebé iha bein-estár fíziku no sosiál kompletu i la'ós de'it tanba la iha moras” sei kontinua ho intervensoens atu hasoru dezafius iha dominiu ida ne'e hanesan:

- Kriasaun sistemas preventivus ba moras.
- Promosaun edukasaun sanitária no alimentár.

Kuadru ida ne'e apela atu hadi'a Sistema Saúde ho objetivu orienta fali atu hetan gañus iha saúde, ba populasau timór tomak.

Espesífiku liu, Política Saúde IV Governu Konstitusionál hakarak promove ekuidade iha asesu atu hetan kuidadu saúde, define fali kobertura ida ho servisus mínimus, adekuadus/apropriadus ba kondisoens konkretas iha Paíz laran, hadi'a dezempeñu sistema no garante qualidade iha prestasaun kuidadus saúde iha níveis hotu.

Governu kompromete atu hadi'a prestasaun ba kuidadus saúde, ho prioriedades ba kamadas desfavoresidas (susar liu) iha populasau leet, tuir kritérius ekuidade iha distribuissau rekursus, efisiênsia no qualidade iha nia utilizaissau. Sei garante efisiênsia rekursus finanseirus, materiais, manutensaun infra-estruturas no ekipamentus, atu kontribui hodi hadi'a prestasaun kuidadus saúde ba populasau i sei mantein kolaborasaun intersektorial no hala'o desenvolvimento parserias.

Atu hetan objetivus hirak ne'e tenke hadi'a lai Servisus Saúde, ho desenvolvimento armoniozu rede infra-estruturas nian no rekursus umanus i ho hadi'a kapasidade iha matéria jestaun.

Governu sei mantein postura diálogo no konsertasaun ho organizasoens representativas área ne'e nian, iha klase, hanesan mós ho organizasoens relijiozas no sociedade sivíl, ho intervensaun iha área saúde atu implementa objetivus ne'ebé trasa.

Governu sei estimula kooperasaun internasionál, multilaterál no bilaterál, ho Países amigus no ajênsias internasionais iha área saúde, atu kombate emerjênsias no transmisaun moras no ba desenvolvimento progresivu sistema saúde Timór-Leste nian.

Kooperasaun entre Cuba ho Timór-Leste sei kontinua, iha kampu saúde, hodi garante ba téknikus saúde kubanu sira kondisoens traballu iha Paíz laran tomak atu sira bele hala'o profisaun no hosi parte seluk kria kondisoens ba ingresu profesionál estudante timór-oan sira ne'ebé sei estuda iha ne'ebá.

2. Kombatentes Libertasaun Nasionál.

Devér konstitusionál atu “rekoñese no valoriza Rezistênsia” tama ona iha enkuadramentu legál no lejislaturas sira uluk hola ona pasus desizivus, hanesan iha nível rejistu ba antigus kombatentes no veteranus no kondekorasaun hosi Estadu ba kombatentes libertasaun nasionál.

Governu rekoñese, valoriza no proteje Kombatentes Libertasaun Nasionál no defende katak kombatente iha papél ativu liu iha prosesu konsolidasaun ba paz, aprofundamentu ba demokrasia progresu iha Paíz ne’e.

Governu defende continuidade ho aprofundamentu atu hola medidas ba segmentu importante ida ne’e iha sosiedade timorensen laran, iha âmbito polítika estabilidade no koezaun sosiál.

Tanba ne’e, propoen:

- Atu kontinua ho medidas institusionais hodi aplika Estadu nia devér atu kondekora Kombatentes ne’ebé seidauk hetan rekoñesimentu ofisiál;
- Selu pensoens ne’ebé prevê ona iha Lei, ba sira ne’ebé iha direitu, ho prioridades ba pensoens sobrevivênsia.
- Loke rejistu foun;
- Harii Instituisaun Konsellu Konsultivu Kombatentes, hanesan plataforma permanente ba konsulta iha implementasaun polítikas a favór Kombatentes libertasaun nasionál;
- Aplika daudauk direitus selu-seluk kombatentes libertasaun nasional nian, hodi hahú hosi halo kartaun nudar beneficiariu protesaun sosial nian;
- Desmobilizasaun membrus FALINTIL;
- Hala’o asoens atu ajuda reinsersaun Kombatentes hanesan ajente istóriku no dezvoltamentu sosiu-ekonómiku Paíz, Demokrasia no Manutensaun Paz.;
- Halo peskizas kona-ba História Luta Libertasaun Nasionál;
- Promosaun asoens formasaun, atu abilita kombatentes libertasaun nasionál sira, iha situasaun vulnerabilidade maibé sei iha kapasidade atu servisu, promove mós ferramentas/meius ba reintegrasaun kondigna iha vida sivíl;
- Implementasaun medidas ba dezvoltamentu projetus kiik ne’ebé bele fó rendimentus, liu hosi finasiamentu Estadu nian, no mós kriasaun fundu espesífiku ida.

4.Ferik/ katuas no Feto sira

Protesaun ba ferik-ho Katua sira

Kestaun kona-ba protesaun ba ema idade sira, ne’e preokupasaun boot ida hosi Governu, ho hanoin katak ferik ho katuas sira, tanba buat sira ne’ebé sira halo iha tempu uluk, sira maka hanesan guardioens patrimóniu istóriku no kulturál Nasaun nian, sira mós sidaduns

ho direitos no responsabilidades, direitu ba integrasaun, atu hetan rekoñesimentu, respeito no protesaun. Bazeia ba prinsípius hirak ne'e maka Governu propoen atu:

- Reforsa no estimula solidariedade no insentivus ba famílias, ho espasus privilegiadus ba insersaun, relasaun no protesaun ba ferik no katuas sira;
- Reforsa no apoia organizasoens hirak ne'ebé promove no dezenvolve atividades ba idozus sira nia di'ak;
- Dezenvolve inisiativas komunitárias ba atendimentu ba ema idade ona liu hosi Sentrus Komunitários ne'ebé sei harii iha sukus;
- Promove edukasaun sívikas no morál, atu muda ou prevene hahalok ladi'ak ne'ebé iha sosiedade ema hatudu ba ferik-katuas sira;
- Dezenvolve no alarga programas informasaun no komunikasaun kona-ba direitos ema idozus sira nian no papél valiozu sosiedade, ba kamadas jovens sira;
- Halo di'ak liu sistema previdênsia no seguransa sosiál ba idozus sira, no kria mekanismus assistênsia sosiál direta no formas seluk tan atu apoia idozus sira, hanesan fó pensoens.

Dezenvolvimentu Feto no sira nia papél iha dezenvolvimentu armoniozu iha sosiedade timorense

Governu ne'e nia intensaun maka atu loke konsiênsia sosiedade ida ne'e nian kona-ba feto sira nia direitos, ne'ebé hakarak tau iha prátika medidas atu:

- Reforsa introdusaun perspetiva jêneru iha konsepsaun no análise kona-ba polítikas i estratégias ba dezenvolvimentu nasional;
- Reforsa partisipasaun Feto nian iha órgauns ne'ebé bele foti desizaun, iha níveis hotu-hotu, partikular liu iha domínios hanesan vida política, ekonómika, sosiál, kulturál, hodi garante ba nia igualdade hetan oportunidades, hodi rekorre ba deskriminasaun pozitivu karik presiza;
- Dezenvolve no alarga programas informasaun, komunikasaun no edukasaun kona-ba direitos Feto nian, uza línguas nasionais no métodos ne'ebé bele aplika (arte no técnicas audiovizuais), ho envolve mós órgauns komunikasaun sosiál, sensibiliza no kapasita sira kona-ba tratamentu kazu violênsia.
- Adopta polítikas vigorozas (forti) atu kombat violênsia doméstika ne'ebé feto sira deit maka sai vítimas;
- Apoia feto ne'ebé hanesan xefi família ho kapasidade ekonómika fraku, liu hosi projetus ne'ebé bele fó rendimentu no autu-empregu;
- Reforsa kapasidade intervensaun organizmus no organizasoens ne'ebé defende direitu feto nian, partikularmente ONGs, fó ba sira rekursus atu dezenvolve sira nia atividade hodi ajuda Feto sira: atu luta kontra kiak; kontra violênsia ho diskriminasaun; hetan asesu ba kréditu, formasaun profisionál no empregu, ba edukasaun no saúde i dezenvolvimentu atividades ne'ebé bele fó rendimentu;
- Hadi'a artikulasaun no koordenasaun entre intervenientes barak, atu optimiza rekursus no fó impaktu hosi respostas ne'ebé hetan.

Kapítulu V

Infra-estruturas no Hadi'a Kualidade Vida

Governu sei halo esforsus atu hadi'a nafatin kualidade vida timór-oan tomak, liu hosi asoens polítikas kona-ba abitasaun (uma), obras públikas, bee, eletrisidade, saneamentu báziku, telekomunikasoens no transportes iha Paíz laran, atu bele hadi'a kondisoens vida ba sira ne'ebé kiak liu.

Dezenvolvimentu ekonómiku no sosiál Paíz ne'e nian labele desliga fali hosi infra-estruturas fízikas, tanba ne'e mós sektór transversál ida ne'ebé kait ho áreas dezenvolvimentu hotu. Só ho sistema infra-estruturas ida ke efektivu maka sei bele promove produtividade agríkola no redusaun pobreza (kiak), posibilita arranke dezenvolvimentu industriál, no kontribui ba dezenvolvimentu umanu, sektór privadu no promove mós turizmu.

Dezenvolvimentu iha sektór ida ne'e tenke tuir prinsípiu ekuidade, atu bele iha dezenvolvimentu ida ke ekilibradu, atu benefísius bele fahe iha Paíz laran tomak, atu labele iha dezigualdade entre zonas urbanas no rurais. Dezenvolvimentu infra-estruturas iha áreas rurais fundamentál atu labele iha asimetrias iha Paíz – espeziál liu, estradas di'ak no sistemas komunikaun atu halo merkadus rurais bele funsiona didi'ak no kontribui atu hamenus kiak ba famílias rurais sira.

Promove formasaun tekniku-profisionál iha área kosntrusaun sivíl, hamutuk ho edukasaun no formasaun ba funsionárius públikus ne'ebé servisu iha área ida ne'e iha nível distritus, sub-distritus no sukus, atu bele respeita nafatin prinsípius ne'ebé planeia ona no téknikas konstrusaun.

1.Abitasaun (Uma)

Governu ida ne'e sei fó prioriedade atu harii abitasoens ba timór-oan tomak espeziál liu sira be sei moris iha situasoens susar no terus liu, hodi promove implementasaun planu urbanizasaun ida iha Dili no iha distritus seluk, bazeia ba buat hirak ne'ebé GERTIL dezenvolve tiha ona, hanesan nia halo tiha ona planu ba sidade Dili ho Baucau.

Konstrusaun abitasoens bele halo ho ajuda inter komunitária, hodi reforsa kooperasaun no lasus komunitárius no fó servisu ba jovens sira hodi kontribui ba estabilidade Paíz.

Tanba ne'e Governu propoen atu:

- Dezenvolve no implementa planu urbanizasaun iha Dili no distritus sira seluk.
- Reduz tendênsia ba kreximentu subúrbius iha kapitál, hodi kria fatin ne'ebé bele atraí populasoes, no reduz êzodu rurál;
- Formula polítikas, leis no regulamentus atu harii abitasoens tuir kritérius ekuidade no kualidade;
- Harii fali edifísius públikus ne'ebé aat tiha ona no harii tan foun.

Governu sei fó atensaun partikulár atu realiza direitu ba uma, hodi dezenvolve esforsus atu define loloos polítika nasonál ba sektór. Iha kontextu ida ne'e, sei fó atensaun ba programas promosaun abitasaun iha vertentes hotu, tuir baze realista ho hanoin halo di'ak kona-ba possibilidades Finansas Públikas no nesesidade atu hadi'a kondisoens uma, liuliu ba sira ne'ebé desfavoresidus liu, tuir redes parseria no mobilizasaun, hodi uza teknolojias no matérias konsentâneas/adekuadas ho podér ekonómiku futurus lokatáriu/arrendatáriu, tantu iha meu urbanu komu iha meu rurál.

2. Obras Públikas

Obras públikas hanesan forma significativa atu impulsiona dezvoltimentu infra-estruturas ekonómikas no sosiais iha Paíz, tanba ne'e presiza normaliza padroens konstrusaun, dezenvolve kapasidade nasonál ba konstrusaun Paíz, hadi'a kualidade obras públikas, insentiva ema uza téknikas no teknolojias modernas maibé tenke uza nafatin matérias lokais.

Governu sei asegura atu hala'o servisu obras públikas atu bele asegura fornimentu bee, eletrisidade, estradas, pontes ba territóriu tomak. Sei konsentra mós nia esforsu atu dezenvolve portus no aeroportus efisientes.

Iha área ida ne'e Governu sei:

- Reabilita no halo estradas foun no pontes, liuliu iha lokais prioritáriu.
- Kria mekanizmus ne'ebé presiza atu asegura konsersasaun no manutensaun estradas no pontes ne'ebé iha ona, atu halo jestaun rekursus ho efikásia, hodi evita atu infra-estruturas hirak ne'e sai aat hotu, ne'ebé tenke hadi'a beibeik ou tenke halo foun fali (hodi buka solusaun ba rai-monu);
- Garante kualidade obras ne'ebé di'ak liu, liu hosi kriaun estruturas Peskiza no Dezvoltimentu hodi halo análizes laboratoriais;
- Elabora estudus atu viabiliza konstrusaun autu-estradas.

3. Bee, Enerjia no Saneamentu Báziku

Hadi'a kualidade vida timór-oan sira hotu, signifika katak tenke proporsiona ba populasaon tomak facilidades hanesan, bee mós, eletrisidade 24 oras, kondisoens sanitárias, liuliu kanalizasaun ho tratamentu esgotus. Ba ida ne'e, Governu asume kompromisu atu hala'o dezvoltimentu sektór ne'e, hodi kria kondisoens para:

- Halo lei kona-ba utilizasaun bee;
- Halo lei kona-ba saneamentu báziku;
- Reabilita instalasoens bee no redes saneamentu ne'ebé iha;
- Konstroe instalasoens foun ba bee no redes saneamentu;
- Promove manutensaun instalasoens;
- Dezenvolve estudus idrolójikus atu halo barrajens ba uzus múltiplus (bee mós, agrikultura, eletrisidade no dezvoltimentu turístiku);

- Implementa interligasoens ba sistemas 20 kv, atu reduz númeru sentrais no facilita interligasaun ba sistema futuru Alta Tensaun (132 kv ou 150 kv);
- Hala'o estudus viabilidade ba konstrusaun sub-estasaun ida iha zona sentrál Dili, atu sentrais seluk bele fornese ahi ba sidade Dili, aleinde Sentrál Comoro no aumenta qualidade servisu;
- Promove estudus ba konstrusaun sentrais hidroeléctricas;
- Reforsa rede distribuisaun eletrisidade ne'ebé iha ona no kria tan rede transporte enerjia foun iha áreas ne'ebe dook.
- Aloka subsídus orsamentais atu disponibiliza eletrisidade;
- Kria programa eletrisidade sustentável.
- Hadia sistema pagamento eletrisidade;
- Aselera projetu enerjia Iralalaru;
- Formasaun no Kapasitasaun rekursus umanus ba desenvolvimentu eficiente no sustentável iha sektór ne'e.

4. Telekomunikasoens

Objetivu fundamentál Governu ida ne'e nian iha área telekomunikasoens, maka desenvolvimentu progresu teknolójiku, liu hosi polítika adequada kona-ba telekomunikasoens ke bele regula sektór no permite desenvolvimentu servisu foun ho baze teknolójiku, ne'ebé insentiva operadores sira iha área ida ne'e, maibé permite asesu ba timór-oan tomak ba servisu hirak ne'e, tuir parâmetrus qualidade no kustus menus liu.

Iha área ida ne'e Governu propoen:

- Atu hadi'a níveis efikásia no atuaun Autoridade Reguladora ba Komunikasoens (ARCOM), ne'ebé tenke funsiona ho autonomia no tuir nia natureza jurídika hanesan Institutu Públiku, hodi aprova regulamentu hotu iha área komunikasoens no ezerse fiskalizaun adequada ba ajentes merkadu;
- Promove instalasaun estasoens monitorizasaun frekuênsias rádiu iha territóriu nasional tomak;
- Avalia kontratus ne'ebé asina ona ho Timor Telecom hodi adopta sistema kompetisaun no estuda sistema monopóliu iha área telekomunikasoens haree tuir vantajens kompetitividade ba timór-oan sira nia benefísius;
- Halo koneksaun liñas telefónicas ba Distritus hotu-hotu no aumenta área abranjênsia;
- Aumenta rede liña telefónica fixa;
- Disemina asesu ba Internet iha Paíz laran, promove interligasaun via rede informatizada entre órgauns Governu, utilizaun komunikaun via lian kona-ba protokolu Internet – VOP, ba instituisoens governu nian no asegura mós kobertura radiu komunikasoens iha áreas rurais;
- Implementasaun Korreius, hanesan empreza Púlika, tuir moldes ne'ebé uza iha parte barak iha mundu, hodi garante nia autonomia administrativa no finanseira, regulamenta atividade postal no konstrusaun infra-estruturas postais neserárias iha Paíz.

- Kria mekanizmus ba prevensaun dezastres naturais, liu hosi implementasaun servisu , rekupersaun no akizisaun ekipamentus automatikus no manuais atu detekta atividades sismolójikas i tsunamis. Ekipamentu hirak ne'e garante mós fornimentu servisu previzaun tempu no medisaun ba udan. Sistema tenke implementa iha estasoens meterolójikas iha Dili, Oe-Cusse Ambeno, Baucau, Suai no Maliana.
- Adezaun Timór-Leste ba WMO – World Meteorology Organization.

5. Transportes

Sirkulasaun ema ho beins maka di'ak liu no aumenta tán, ne'e hanesan faktór fundamentál ida atu impulsiona kreximentu ekonómiku no dezenvolvimentu armoniozu iha territóriu Nasionál tomak.

Programa Governu kona-ba sektór ida ne'e sei kumpri objetivus hanesan ne'e:

- Haree di'ak fali lejislasaun kona-ba Kódigu Estrada;
- Kria trasnportes públikus terrestres, ho tarifas ke bele benefisia ema kiak sira;
- Regulamenta sektór transportes privadus, hanesan taxi;
- Hadi'a no aumenta sinais trãnzitu iha territóriu nasional atu prevene dezastres;
- Insentiva expansaun rede trasnportes karga ba zonas rurais, atu apoia agrikultores no sektores seluk iha komersializasaun produsus agríkolos no sasán seluk tán;
- Haree di'ak fali taixas importasaun veíkulus.
- Kria mekanismu atu desentraliza inspeksaun ba veíkulus;
- Kria mekanizmus ba operacionalizasaun seguru obrigatóriu;
- Hadi'a no aumenta portus marítimus iha rejioens balu atu fasilita transporte kargas ho passajeirus;
- Tau iha funsionamentu aeroportu internasionál Baucau;
- Adopta sistema kompetitivu ba empresas ba voos intenasionais;
- Kria liñas marítimas internasionais ba viajens passajeirus, liuliu entre Timór-Leste ho Indonézia i Australia;
- Iha área transportes terrestres, harii postus atendimentu iha Distritus atu promove servisu inspesaun, rejistu veíkulus no fó lisensas no karta kondusaun ho lailais;
- Kona-ba transportes marítimus, haree di'ak fali regulamentasaun ba atividade portuária, konstrusaun portu inklinadu ida iha Baía Tibar, halo kooperasaun ho Governu Alemaun, inklui mós planu estudu viabilidade atu halo portu komersiál ida iha fatin ne'e hotu.
- Kona-ba transportes aéreus, importante salienta nesesidade halo regulamentasaun atividade aeroportuária no konstrusaun aeroportus doméstikus iha Same, Suai, Maliana no Oe-cusse/Ambenu no revitalizasaun aeroportu Baucau.
- Implementasaun sistema kontrolu adekuaudu ida ba ekipamentus no viaturas Estadu nian no nia manutensaun.

6. Meiu-ambiente, reflorestasaun no Prevensaun Dezastres Naturais.

Governu asume ona kompromisu atu desenvolve polítika ambientál, orienta ho prinsípius desenvolvimentu durável, integra ho armonia komponente ambientál, ekonómika no sosiu-kulturál. Tanba metade illa ida ne'e sorti boot tanba rekursus naturais barak, ita enfrenta dezafiu atu fó valór ba riku-soin ne'e ho promove jestaun no ordenamentu territóriu ne'ebé labele estraga fali ita nia paizajen naturál;

Ita sei promove polítika klara ida kona-ba protesau vida marítima, espesial liu-liu korais, atu labele aat, i iha futuru bele halo sai hanesan sentrus atrasaun turístika;

Reflorestasaun mós urjenti, tanba prezisa eduka populasoens atu labele kontinua estraga meu-ambiente, no hatama valores protesau rai no natureza.

Governu iha nia planu desenvolvimentu nasionál, propoen atu halao estudus ba prezervasaun bolsas florestais, atu insentiva kultura sitemátika no ordenada ba ai ita nian rasik ho valór komersiál, no estudus introdusaun madeiras (ai) foun, atu kria autu-sufisiênsia, hodi reduz ba máximu importaun ai.

6.1. Polítika Ambientál

Dezenvolvimentu Paíz tenke armoniozu no ekolójikamente ekilibradu, tanba ne'e kreximentu ekonómiku hamutuk ho defeza ba valores naturais ho ambientais sai hanesan tarefa nasionál ne'ebé ita hotu tenke halo. Dezenvolvimentu sustentadu hakarak atinje progresu ida tuir medida ita Ema nian, hodi representa vivênsia ekolójika no umanístika atu nune'e bele garante qualidade vida di'ak liu ba timór-oan tomak.

Polítika Ambiente ne'ebé IV Governu atu kontinua, fundamenta iha prinsípius sustentabilidade, transversalidade; integrasaun, ekuidade no partisipasaun.

Objetivu atu prezerva no defende patrimóniu naturál Paíz ne'e nian, hanesan obrigasaun Governu ne'ebé elementár liu hotu perante jerasoens futuras.

Governu hakarak fó ba área ambientál estatutu nudar vektór esensiál, integrante no indispensável iha estratéjia desenvolvimentu ba médiu/longu prazu, atu bele retira hosi ambiente konotasaun negativa kona-ba restrisaun imposta ba polítikas kreximentu ekonómiku.

Kondisaun atuál desenvolvimentu Paíz ejize atu hasa'e padroens ambientais iha domínus oioin hanesan kondisaun indispensável atu hadi'a qualidade vida timór-oan sira nian. Ambiente tenke sai hosi espasu marjinál ne'ebé sei okupa, hodi sai hanesan denominadór komun ida ba definisaun polítikas globais no sektorais.

Objetivu ikus nian maka, atu fó ba sidadauns qualidade vida ke dia'k liu, hodi promove jestaun rasionál ida ba rekursus naturais, protesau ba ambiente, defeza no rekuperasaun

ba patrimóniu arkitektóniku no kulturál no prezervasaun zonas ho interesese paizajístiku no ekolójiku aas tebes.

Promosaun di'ak ida ba rekursus naturais no implementasaun asoens konkretas iha domíniu ambiente bele garante sidadauns sira hetan níveis kualidade vida aas, la haree ba fatin ne'ebé sira hela iha territóriu nasional.

Atu konkretiza objetivus hirak ne'e, medidas ne'ebé importante liu maka:

- Defini polítika ambiente no rekursus naturais no haree ba integrasaun komponente ambientál iha polítikas sektorais, fundamenta iha prinsípus sustentabilidade, transversalidade, integrasaun. Akuidade no partisipasaun, valorizasaun rekursus naturais ne'ebé enkuadra dezenvolvimentu agríkola no florestál ho koneservasaun natureza. Konsekuentemente sei elabora Planu Nasionál ida ba implementasaun Politika ida ne'e.
- Elabora Lei Bazes ba Ambiente no konsolidasaun lejislasaun kona-ba áreas Protejidas, ba Avaliasaun Impaktus Ambientais no Kontrou Poluisaun, atu bele possibilta intervensaun adekuada ida hosi komponente polítika ambientál. Partikulár liu, lejislasaun relasiona ho estudus kona-ba impaktu ambientál nia objetivu primordiál maka atu analiza atividades no projetus balu, ne'ebé tanba nia dimensaun ou natureza, representa presoens ba ambiente, iha faze prévia ba lisensiamentu;
- Adopta providênsias lejislativas, ho natureza penál, kona-ba defeza ambiente, hodi fó protesaun ba paizajen, rekursus naturais no meu-ambiente ein jerál.
- Adapta ou substitui instrumentus legais oioin kona-ba ambiente ba sistema jurídiku atuál, atu nune'e bele providensia kuadru legál ambientál ida ke adapta ho realidade Timór-Leste;
- Implementa Akordus Multilaterais Ambientais ne'ebé Timór-Leste asina tiha ona, hanesan Konvensoens 3 iha Rio (UNFCCC – Konvensaun Kuadru Nasoens Unidas ba Alterasoens Klimátikas, UNCBD – Konvensaun Nasoens Unidas ba Diversidade Biolójika, UNCCD – Konvensaun Nasoens Unidas ba Desertifikasaun). Tanba ida ne'e maka área krítika no fundamentál liu iha intervensaun ambientál, transversál desde definisaun polítikas jerais globais ba implementasaun projetus aplikasaun nasional ho lokál, mak Governu sei providensia meus nesesáriu atu jere sektór ne'e hodi kumpri responsabilidades no interesese Timór-Leste nian hanesan membru efetivu konvensoens;
- Incentiva partisipasaun sidadauns no ajentes sosiais hotu hodi possibilta asesu fásil ba informasaun ambientál. Asoens sensibilizasaun ba populasaun sei hala'o i sei promove programa edukasaun ambientál atu iha sistema edukativu nia laran ka iha li'ur, bele halo sensibilizasaun no formasaun sidadauns kona-ba domínus ambientais oioin. Liuliu iha nível lokál, tanba sensibilizasaun ambientál prezisa tebes, fomenta projetus sensibilizasaun ambientál ne'ebé envolve pontus fokais ambientais, atu inkrementa ligasaun Governu Sentrál ho Distritus no Sukus.
- Elabora no implementa iha Paíz rede Nasionál Vijilânsia ba kualidade ambiente, hodi utiliza meus téknikus no informátikus adekuadus ba nia konkretizasaun. Sei

reforsa neinek, meius laboratoriais no téknikus ba análize no avaliasaun Kualidade Bee, Ar no Rai.

- Implementa sistema Kontrolu Poluisaun liu hosi aprovasaun lejislasaun no implementa Sistema Lisensiamentu Ambientál;
- Promove elaborasaun Polítika Nasionál Jestaun ba rezídius, no depois elaborasaun Planu Nasionál ida atu implementa halo di'ak, hodi aposta iha asoens produtivas ba produsaun rezíduus.
- Promove no dezenvolve sistemas integradus ba rekolla, tratamentu, valorizasaun no destinu finál rezíduus (ezemplu, ólius uza ona, metais no plástikus);
- Insentiva asoens rekolla, separasaun, resiklajen no inisiativas ba rekuperaun rezíduus pasíveis atu valoriza fali;
- Fó ênfaze espesiál ba definisaun Polítika, Estratéjia ou Planu Nasionál Konservasaun Natureza no Biodiversidade, artikulada ho orientasoens internasionais ne'ebé Timór-Leste kompromete ona, i labele haluha definisaun ba espésies sinejéticas, direitus animais sira nian ein jerál, komérsiu plantas no animais, protesaun ba ailaran, prezervasaun biótípus no protesaun espésies raras/protejidas;
- Promove defeza Sistema Nasionál ba Áreas Protejidas, hodi artikula polítika ambiente ho Ordenamentu Teritóriu;
- Aprova lei foun kona ba zonas protejidas, hodi haree di'ak fali no atualiza regulamentu UNTAET;
- Tuir lejislasaun ne'ebé aprova tiha ona, bele kria zonas protejidas iha Paíz.

6.2. Polítika Reflorestasaun

Iha área ida ne'e IV Governu Konstitusionál propoen atu dezenvolve:

- Kriasaun “viveirus” ai atu hakiak ailaran;
- Kria sistema prevensaun ba erozaun rai no ailaran.
- Kria programa konsertadu ba reflorestasaun iha distritus hotu-hotu, ho objetivu atu sidadaun ida-ida , tinan-tinan kuda ai-hun ida antes de tempu udan, liu hosi subsídius no insentivus ba suku ida-idak. Plantasaun ai tenke enkuadra iha estudu ketak ida atu dezenvolve : ai ba uzu doméstiku; ai ba rekualifikasaun umana no ambiental no ai ba uzu komersiál;
- Formasaun guardas florestais;
- Reflorestasaun rai maran no mamuk;
- Kriasaun no protesaun Sentrus Florestais;
- Kriasaun Lejislasaun kona-ba sektór;
- Edukasaun sívika ba protesaun florestas.

6.3. Prevensaun ba Dezastres Naturais

Haree ba lokalizasaun geográfika Timór-leste nian, Paíz ne'e bele sai vulnerável ba dezastres tanba anomalias klimáticas ne'ebé bele iha impaktu dezastrozu (aat) ba infra-estruturas ekonómikas no sosiais no afekta kondisaun vida timor-oan nian.

Tanba ne'e, Governu ida ne'e konsidera prioritáriu dezvoltamentu polítika prevensaun dezastres naturais ne'ebé bele halakon ema nia vida ho riku-soin.

Ne'ebé tenke konsolida kultura prevensaun iha Paíz atu prevene dezastres naturais ou pelu menus hamenus nia efektus hanesan:

- Promove estudu identifikaun kona-ba zonas risku.
- Kria sistemas avizu préviu, liuliu kona-ba udan boot no tempu bai-loron;
- Forma no kapasita rekursus umanus iha área ida ne'e, atu bele hatán kedas kuandu mosu kalamidades/dezastres.
- Prepara mekanizmus koordenasaun inter-sektoriál atu hodi hatán hasoru dezastres naturais.

Kapítulu VI

Promosaun Igualdade, Yolerânsia, Seguransa Interna no Reforsu Demokrasia

Moris iha liberdade signifika harii sistema demokrátiku, ne'ebé ema respeita valores fundamentais Ema nian, hanesan indivíduo ka asociadu. Esênsia demokrasia maka pluralizmu ideias i signifika katak hanoin oioin.

Liberdade expresaun bazeia ba Direitus Fundamentais Ema nian, direitu ema ida-idak nian, la iha ema obriga, halo intimidasaun fízika ka psikolójika ou polítika – atu hanoin, fiar no hili.

Tanba ne'e demokrasia tenke moris nafatin no hametin liután iha povu nia leet. Demokrasia labele rezume deit ba iha atu eleitorál, tinan 5 dala ida maibé iha moris loro-loron nian entre timór-oan tomak, hosi comunidades kiik to'o sidade boot.

Governu ida ne'e hakarak garante katak prosesu demokrátiku tenke reforsa ho atus Estadu nian no sociedade no hakle'an liután ho partisipasaun povu.

Atu kontribui ba ida ne'e, partidus polítikus sira tenke dedika-an ho seriedade ba edukasaun polítika ba ita nia povu, atu iha tolerânsia polítika, tanba só nune'e, liu hosi atus no komportamentus, maka bele haree aseitasaun naturál ba ema seluk nia direitu, hanesan indivíduo ka grupu polítiku, hodi luta hasoru violênsia, liuliu ida be Partidus polítikus rasik maka provoka.

Demokrasia efetiva signifika hosi parte ida iha partidus polítikus mesak forti no iha kbiit atu formula no implementa programas alenativus ba Governu no hosi parte seluk, iha reforsu efetivu ba ezersísiu direitus, liberdades no garantias sidadausn hotu-hotu nian, tuir hakerek iha Konstituisaun.

Governu ida ne'e hakarak halakon frajilidade prosesu demokrátiku iha Paíz ne'e, tan ne'e hakarak servisu hamutuk ho Parlamentu Nasionál atu reforsa sistema multipatidáriu iha Timór-Leste.

1. Paz no Seguransa

Primadu vida demokrátika maka wainhira iha sosiedade forti ida ho respeita direitus sidadauns hotu-hotu, públiku mós moris hakmatek.

Estabilidade interna no seguransa ba ema no beins hanesan elementus determinantes ba paz sosiál no trankuilidade (hakmatek) ba sidadauns hotu. Hanesan kondisaun *sine qua non*, maka dezentvolvimentu naran Paíz ida nian, espesiál Timór-Leste, tanba efeitu psikolójiku favorável ne'ebé nia desperta ba investidores potenciais no operadores ekonómikus.

Iha kaudru ne'e, kestoens sentrais ba seguransa interna no sistema nasional informasoens, ne'ebé prezerva estabilidade no koezaun tesidu sosiál no asegura direitus,liberdades no garantias sidadauns hotu-hotu nian, tenke sai hanesan asuntu preokupasaun partidus polítikus sira nian no sosiedade ein jerál, hodi halo debate alargadu no sériu.

Kona-ba seguransa ema no beins i orden pública, Governu sei dedika nia atensaun tomak ba formasaun tékniku-profisionál ba ajentes seguransa, hanesan kondisaun uluk liu nian atu wainhira hakarak atinje fins, tenke respeita nafatin prinsípius konstitusionais no direitus fundamentais sidadauns nian.

Seguransa interna relaciona ho prevensaun no jestaun konfliktus. Tanba ne'e preziza mós halo transformasaun atitudes no mentalidades no respeita diferensas. Diálogo, mediasaun, rekonsiliaasaun hanesan meius esensiais atu hatama iha ema, kbiit ba prevensaun konfliktus, liu hosi eduksaun sívika, jestaun konfliktus, demokrasia no rezolusaun konfliktus.

Ajentes orden pública tenke servisu no kolabora di'ak ho sosiedade sivíl, inklui Igreja.

Governu sei halo esforsus atu dignifika instituisaun polisiál, i hamutuk halo revizaun ba nia estrutura, implantasaun territoriál, mekanizmus, prosedimentus, formas atuasaun, ne'ebé ita bele haree liu hosi aproximasaun efetiva ba populasoens, ne'ebé PNTL tenke serve nafatin no efikaz.

Atu presta servisu ho qualidade ba sidadauns, sei garante artikulasan adekuada entre forsa servisu oiain, hanesan PNTL no Servisu Nasionál ba Protesaun Sivíl; iha perspetiva entendimentu, seguransa no orden pública nasional, enkuantu sistema fasilita koordenasaun, hodi nune'e mós bele halo racionalizasan ba rekursus sei fraku ne'ebé iha.

Tanba ne'e, Governu kompromete-an atu hola desizoens polítikas estruturantes:

Afirma Autoridade Estadu

Paíz ne'e sei iha faze embrionária, tanba ne'e urjenti atu ajusta ba nesesidades atuais,meius ne'ebé bele garante protesausn bázika no liberdades sidadauns sira hotu nian, no projeta kreximentu instituisoens seguransa, hodi reabilita instrumentus atu hatán ba ameasas ne'ebé bele estraga paz no trankuilidade públicas.

Hanesan faktór agregasaun sosiál no konstrusaun identidade nasional, Polítka ba Seguransa tenke delinea-an atu kompleta esforsu Estadu nian ba promosaun koezaun nasional, hodi kontrola faktores hirak ne'ebé lori ba eksluzaun sosiál. Faktores agregasaun sosiál maka prátikas hirak ne'ebé la respeita igualdade direitus, imparcialidade no aplikasaun lei iha li'ur, laós iha tribunál, hodi respeita ba tradisoens no costumes ne'ebé la viola prinsípius legais no konstitusionais.

Elementu fundamentál Estadu de direitu demokrátiku no liberdade ba sidadauns nian, maka garantia kona-ba kumprimentu efikaz ba desizoens tribunais, hodi dudu dook tiha sentimentu impunidade ema sira ne'ebé halo sala ho sosiedade ein jerál, hodi afirma autoridade Estadu no Instituisoens.

Kombate kriminalidade

Governu sei fó atensaun partikulár atu kombate violênsia hosi grupus organizadus, hola medidas lejislativas nesesárias ba regulamentasaun ba nia atividade no fó ba Polísia formasaun ho meius nesesários atu hatán ho efikásia ba atividades marjinais hirak ne'e.

Entre meius umanus nesesários, importante liu maka kriasaun núkleu spesífiku investigasaun kriminal, valoriza propóziutu atu foti hanesan prioridade, kombate ba kriminalidade no tahan netik formas kriminalidades emerjentes, hanesan tráfiku droga, imigrasaun ilegal etc.

Governu sei fó atensaun espesial atu reforsa kapasidade sistema Imigrasaun atu regula entradas no saídas sidadauns Timór-Leste nian. Polítika ida ane'e sei hala'o atau prevene movimentus ilegais iha Paíz, potenciadores atu kria instabilidade, inklui mós atividades hanesan terroristas.

Konsidera mós nesesidade atu fó ba Polísia sistema komunikaun versátil no integradu, kapaz de funsiona iha rede alargada ba ligasaun organizmus hotu-hotu, inkluzivamente ba protesasaun sivíl no emerjênsia, lokalizadu iha eskuadras polísia no elementus PNLT nian maka opera.

Governu tenke hadia buat barak ke kuran liu hosi planu investmentus hodi arranja meius materiais no bele promove i dezenvolve kedas formasaun tékniku-profisionál rekursus umanus tomak iha sektór ida ne'e.

Reforsu ba Sistema Prizonal

Atu bele iha justisa no atu iha kombate efektivu ba impunidade, prizaun hotu tenki halo restruturasaun. Halo rekuperasaun ba edifísios prizonais no rekualifiasaun ba sira nia servisus no harii prizoens foun atu hamutuk ho aplikasaun justisa tenke fó mós dignidade ba sira ne'ebé simu ona todan tanba krimes sira komete.

La haluha nesesidade atu reforsa kualifikasoens profisionais ba guardas prizonais.

Atu responde ba preokupasoens hirak ne'e, Governu propoen, iha âmbito Reforma Sektor Seguransa, atu implementa medidas hanesan ne'e:

- Reformulasaun ba Lei Seguransa Interna, hodi klarifka limites jerais atividades órgauns funksionais, integra ho ida-idak nia misaun.
- Ativasaun ba Gabinete Koordinador Seguransa, tuir Lei Seguransa atuál atu artikula atividades operasionais no koordinasaun, no prepara meius umanus i materiais atu sira bele operacionaliza órgauns ne'ebé iha.
- Halo revizaun ba Lei Orgânica Ministériu Seguransa;
- Halo Reforma Lejislativa ba PNTL ho fó relevu espeisial ba diplomas hirak ne'e: Lei Orgânica PNTL; Kadrus Orgânikus (Pesoál, Material no ekipamentu); Regulamentu Disiplinár no Estatutus ba Pesoál, Transferênsia no Karreiras, Níveis Profissionais, Promosoens no Saláriu;
- Halo estudu kona-ba pensoens.

Reorganizaasaun ba PNTL

- Halakon Unidade Marítima, transfere nia kompetênsia ba Ministériu Defeza, hodi asegura Komponente Navál, patrullamentu kosteiru no oseâniku, ekonomiza meius ho rekursus atu bele simplifika atividades komandu no halo kontrolu no koordinasaun sektor;
- Halakon Unidade Patrullamentu Fronteira (UPF), transfere nia kompetênsias ba Ministériu Defeza ho empenhamentu Unidades F-FDTL, i mantein nafatin postus iha fronteira, alfândega no Departamentu Migrasaun;
- Harii unidade espeisial, hanaran Unidade de Operasoens Espesiais, atu substitui UIR no URP, atu integra mós componentes espesifikas hosi Seguransa Pesoál, Operasoens Espesiais no Enjeñus Explosivus Improvizadus;
- Aumenta kapasidade servisu intelijênsia atu fó informasaun loloos nian ba PNTL hodi dezenvolve nia operasoens;
- Aumenta kapasidade polísia komunitária atu prevene konfliktus no atende nesidades sidadauns sira tuir termus seguransa pública;
- Revizaun ba diplomas fundamentais ne'ebé regula PNTL, atu bele hametin nia autonomia operasionál no kadeia komandu;
- Klasifika fali unidades territoriais;
- Adekua kadru pesoál tuir nesidades reais Paíz;
- Restrutura servisu sosiais;
- Valoriza mêritu hanesan kritériu ba promosaun;
- Atualiza regulamentu jerál ba kilat ho explosivus;
- Halo desenvolvimentu infraestruturál no apoiu lojítiku, hanesan instalasoens operasionais di'ak nian, instalasoens sosiu-familiares no kriaun sistema autu-sustentabilidade (hahán, kombustível, manutensaun, fardamentu nst.) atu fasilita transferênsias;
- Aposta iha formasaun intensiva no iha ezersísiu (*on job training*) ba níveis no eskaloens hotu-hotu entre membrus PNTL, no hatama programas espesifikus;
- Intensifika no diversifika kooperasaun iha nível nasional no internasionál;

- Apetrexas unidades, fó kbiit réal ba vertente preventiva Polísia Orden Públika;
- Institui/tau polisiamentu proximidade/eskuadras;
- Defini programa efisiente ida atu ekipa Polísia ho rekursus materiais esensiais ba atu hala'o nia knaar, inklui mós loke kantina ho izensaun taxas ho partisipasaun subsídios hosi parte Estadu, hahú iha Dili, Baucau ho Maliana;

Artikulasau PNTL ho F-FDTL

Artikulasau Polísia Nasionál Timór-Leste ho Forsas Defeza Timór-Leste ne'ebé tenke ho referênsia iha Lei Defeza Nasionál no Forsas Armadas no regulamenta ho diploma ketak, sai hanesan buat importante tebes, liuliu, kuandu iha konflitus boot ne'ebé bele mosu iha Rai Laran ka mai hosi li'ur, i bele afeta funksionamentu normál órgauns Estadu.

Protesaun Sivíl

Kona ba protesau sivil Governu sei hasai desizoens polítikas bázikas:

- Considera, tuir âmbito emerjênsia, katak sira ne'ebé ezerse funsoens protesau sivil, iha domínios avizu, alerta, intervensaun imediata, sokorru/tulun no assistênsia, maka F-FDTL, PNTL, autoridades marítimas, portuárias, aeronautikas, bombeirus, servisu urjênsia ospitalár no Kruz Vermella.
- Halo aprovasau ba lejislasau apropiada ida (Lei Orgânica) ba Servisu Protesau Sivil no Bombeirus, ho objetivu atu fó protesau, sokorru ba ema, sasán no prevene mós riskus relasiona ho situasoens asidente, katástrofe ka kalamidade, no oinsá rezolve efeitos hosi situasoens hanesan ne'e;
- Apoia empresas seguransa privada fó formasaun ba sira nia kuadrus;

Seguransa Rodoviária (estrada)

- Kria kondisoens atu implementa medidas kontrolu tuir lei hodi regula ema ne'ebé lanu maibé kaer kareta/motór;
- Introduz kritérius seguransa ba fiskalizasaun rodoviária, reforsa kompetênsia polísia nian sobre matéria ne'e;
- Introduz medidas kontrolu atu hamenus sinistralidade/asidentes.

2. Justisa

Governu ne'e haree katak hadi'a sistema judisiáriu iha Timór-Leste, liuliu nia efisiênsia ho efikasias, ne'e halo parte prosesu boot ida ba modernizasaun Estadu no hametin desenvolvimentu ekonómiku-sosiál.

Reforma no ordenamentu jurídikus iha Timór-Leste tenke integra iha kuadru prosesu jerál ba desenvolvimentu Paíz, atu hala'o didi'ak demokrasia no direitus sidadauns tomak.

Infra-estruturas ne'ebé menus, prezisa tan rekursus umanus kualifikadus, laiha transparênsia, distânsia entre sistema, sidadauns no luta atu rezolve problemas tanba konsepsaun burokrátiku maka'as, hanesan fatores kondisionantes ba justisa, ne'ebé Governu oras ne'e hasoru, nudar servisu públiku ida ke Estadu aseguira ba sidadauns sira.

Estratéjia atu implementa maka hanesan imperativu ba lejislatura ida ne'e, ne'ebé tenke halo koordenasaun globál entre tribunais no servisu públikus sira seluk, ligadus ho justisa, ho nafatin objetivu ne'ebé Governu anunsia ona, maka hanesan desentraliza administrasaun, i nuné mos katak justisa mós tenke desentraliza.

- Nune'e, iha desenvolvimentu ba ordenamentu jurídiku Timór-Leste prevê ona atu kria “Diresaun Nasionál Asesoria Jurídika no Lejislasaun”, hanesan entidade privilejiada atu hala'o konsertasaun ba produsaun lejislativa nian, kapaz atu kontribui ba uniformidade no armonia sistema legál.

Governu entende katak estrutura organizaun judisiária tenke hanoin ikas fali – *maibé la'ós atu halakon fali avansus hirak ne'ebé konsege ona to'o agora* – hodi hatama prioridades lejislativas iha âmbito administrasaun judisiária:

- Aprovasaun no entrada iha vigór ba Kódigu Penál;
- Aprovasaun no entrada iha vigór ba Kódigu Sivíl, liuliu iha domínus familia ho susesoens;
- Estatutu ofisiais justisa sira nia, funsoens no leis orgânikas tribunais sira no sekretarias judisiais;
- Nesesidade ba sistema ida ke integradu liu ba rezolusaun litíjius/konfliktus;
- Lejislasaun ba menores/labarik
- Lejislasaun kona-ba terras no propriedades;
- Lejislasaun atu regula ezersísiu advokasia privada, hanesan, inskrisaun no sertifikasaun/karteira profesionál;
- Enkuadra variáveis polítikas, ekonómikas, sosiais, demográfikas no institusionais iha Paíz, relaciona ho soberania poder judisiál no proximidade ba sidadauns, no nesesidade atu kria tan asesu ba justisa.

Hamutuk ho lejislasaun espesífika ba seguransa, defeza no investimentu privadu (internu no externu) no aproximasaun progresiva i di'ak entre sistemas modernus no sistemas tradisionais justisa nian, Governu sei fó atensaun ba inisiativas lejislativas seluk tan, ne'ebé iha relevânsia ba interese nasional hanesan:

- Kódigu Prosedimentu Administrativu
- Institucionalizasaun Tribunál Kontas.

Governu ida ne'e, tuir Konstituisaun, rekoñese katak Tribunais sira hanesan pilares esensiais ba Estadu de Direitu Demokrátiku; hanesan órgaun soberania ida hamutuk ho poder lejislativu no ezekutivu, tanba ne'e, importante defini estratéjias ba sektor ne'e. Ba medida ida ne'e, i tanba iha Timór-Leste, Tribunais sira ema kritika barak – *entre razoens seluk, tanba inefikásia, inasesibilidade ou morozidade* – Governu atu hadi'a quadru persepoens ida ne'e, propoen atu promove reformas administrasaun judisiák lubun ida,

ne'ebé bele agrupa ba tipu haat, atu hodi hadi'a efikásia prosesuál,igualdade formál, direitus prosesuais, imparcialidade no possibilidade halo rekursu:

- Aumentu progresivu kuantidade rekursus ba tribunais (no ba operadores judisiáriu sira seluk);
- Formasaun kuadrus no melloria kapasidade jestaun sistema judisiáriu;
- Introdusaun ou reforsu teknolojia iha organizasaun prosesu no tribunais;
- Dezenvolvimentu ba meius alternativus, substitutivus ou komplementares, ba rezolusaun litíjius.

Modernizasaun Administrativa no Jestaun Sistema Judisiáriu – Organizasaun, jestaun no planeamentu iha nível sentrá!

Organizasaun, jestaun no planeamentu sistema justisa, iha nível sentrá, depende ba Konsellus Superiores Magistraturas (Ministériu Públiku nian, seidak iha), Administrasoens Tribunais no Ministériu Justisa. Ami hanoin katak hosi parte ida estrukturas hirak ne'e la iha kapasidade atu hasoru ezijênsias jestaun no planeamentu ba nia intervensaun iha sistema justisa, i hosi parte seluk kompetênsias jestaun no administrasaun hosi komponentes oioin sistema nian, namkari hela, i asosia/liga tan ho difikuldade estruktural iha koordenasaun esforsu entidades hotu-hotu, impede netik atuasaun konsertada atu aplika medidas ne'ebé efisientes liu.

Nune'e Governu propoen:

- Reforsu kompetênsias Konsellu Superiór, ho unidades téknikas atu bele iha dezempeñu di'ak liu iha administrasaun sistema tuir área kompetênsia;
- Kriasaun estruktura koordenasaun no planeamentu konjuntu ba polítikas administrasaun rekursus umanus (no materiais) iha sistema justisa, ho partisipasaun Konsellus Superiores, Administrasoens Tribunál no Ministériu Justisa. Estruktura ida ne'e bele iha papél konsertasaun kona ba polítikas no asoens atu halo sistema justisa sai eficiente liu;
- Kriasaun iha nível sentrá, gabinete komunikasaun sosiál ida ba kestoens justisa, hodi dezenvolve relasaun virtuoza entre justisa ho komunikasaun sosiál.

Definisaun Polítika Públika foun ba Justisa

Sistema integradu ba rezolusaun litíjius, ne'ebé ami prekoniza, presupoen katak Estadu asumi relasaun foun (alternativa, komplementár i substitutiva) entre meius naun judisiais ba rezolusaun litíjius no sistema judisiál, sistema ke la'ós ekskluzau, maibé inkluzau. Polítika públika administrasaun justisa nian, sei la sentra iha ekskluzividade Tribunais sira nian, maibé sei asumi katak só pluralizmu jurídiku no pluralidade meius naun judisiais ba rezolusaun litíjius, ne'ebé konsebe/hanoin ho forma integradu, bele halo justisa sai asesível, eficiente no demokrátika liu.

Iha sistema rezolusaun konfliktus, ne'ebé Estadu Timór propoen atu dezenvolve, rekonfigura, iha parte ida, funsoens Estadu no sosiedade sivíl, dezenvolve mós parseries kiik entre públika no komidade ou, merkadu, hodi asume modelu justisa foun ida,

ne'ebé kestaun fundamentál maka terseira parte ne'ebé sidadaun maka hili atu rezolve nia litíjiu la prezisa estruturas formais Estadu maka impen, maibé korresponde ho meu ida ke asesível, besik, lais, efisiente liu hodi proteje nia direitus.

Polítika ida ba Sektór Justisa balanseadu ho Kontrolu Sosiál

Funsaun kontrolu sosiál tribunais refere ba nia kontribuisaun, espesífika, ba manutensaun ba orden sosiál no nia restaurasun wainhira violada. Ho medida ida ne'e, justisa penál, sei atua sobre komportamentus ne'ebé ein jerál desvia/sés tiha hosi valores ne'ebé rekoñese hanesan importante tebes ba reprodusan normál sosiedade timorense (valores vida, integridade fízika, onra no propriedade nst.).

Konsolidasaun Kultura Judisiária

Bele koloka justisa ba servisu sidadania no hametin demokrasia, vektór ida ke tenke liu hosi dezvoltamentu no reforsu ba modelu rekrutamentu no formasaun ba operadores judisiáriu, em espesial, majistradus sira, modelu ida ne'ebé dezvoltave dadaun iha sentru formasaun jurídika no iha kursu direitu iha Universidade Nasionál Timór-Leste.

Reforsu mós, ba plataformas kooperasaun (ba hirak ne'ebé iha tiha ona iha área) no halo tan foun, purezemplu, ho instituisoens no operadores judisiáriu Macau nian.

Iha sosiedades demokrátikas, funsionamentu independente, asesível no efikaz tribunais sira, ba ohin lora, sai hanesan kausoens robustas/forti liu ba lejitimidade sistema polítiku, funsionamentu ida ke iha Timór-Leste, sei dook hosi metas (target) ne'ebé Governu hakarak hetan/atinje.

Konkretizasaun, iha nível nasionál ba justisa ne'ebé lokalizada liu

Atus litíjius ho intensidade kiik ka natón, tuir Governu nia hanoin, bele (des) judisializadus ona ba justisa proximidade nian (katak iha fatin, iha besik).

Hosi parte seluk, tenke harii baze naun judisiál no alargada tuir territóriu ho komisoens protesaun ba labarik sira, fetu, ferik-katuas no jovens iha perigu laran, ne'ebé, integradas iha polítikas Governu nian, bele hatán ba solisitasoens/pedidus imediatas hosi grupus sosiais vulneráveis tebes, ne'ebé labele hein kleur liu desizaun judisiál.

Komisoens hirak ne'e, ne'ebé hetan fatin iha departamentus governamentais solidariedae no protesaun sosiál nian bele hatán ba problema ho forma artikulada hamutuk ho organizasoens naun governamentais, ne'ebé iha âmbito akonsellamentu jurídiku no akompañamentu ba grupus sosiais ne'ebé desprotejidus liu, bele responde, lokalmente ba solisitasoens hosi populaasaun ne'ebé prezisa liu.

Ami hakarak mós konkretizasaun progresiva ida – enkuantu sistema konsolida daudaun instânsias sira iha okos – hosi instânsias judisiais ne'ebé seidak iha, iha jurisdisaun

komun (i.e Supremu Tribunál Justisa), ou Tribunais Espesiais ne'ebé hakerek ona iha Konstituisaun maibé seidak harii (Tribunál Superiór Administrativu, Fiskál i, ein partikulár no prezisa lalais liu maka Tribunál Kontas).

Ultrapasa karênsia (kuran) formasaun iha polísia sira, ne'ebé hasoru iha investigasaun kriminál

Falta estruturas no koñesimentu atu halo investigasaun ba krime. Blokeiu komesa kedas iha levantamentou ba autus de notísia, tanba hosi ne'e, bele rezulta ona provas lubun ida ou elementus lubun ida ke bele permite halo kedas – *no lailais i efikaz liu* – konkluziun ba inkéritu, ou bele halo kedas audiênsia. Akontese normalmente, hanesan ita hotu hatene, katak autus barak maka elabora aat hela, hakerek aat hela (ida mós tanba la iha koñesimentus língua/lian eskrita) i dala barak difísil atu komprende (*tuir hirak ne'ebé ajente ida ne'e ka ida ne'ebá, ne'ebé preparadu liu uitoan, maka prepara*). Governu tenke muda situasaun iha área ida ne'e.

Servisus Notariadu no Konservatórias

Dinamizasaun mekanizmus Estatais ba konsolidasaun direitus. Governu entende katak dezenvolvimentu, partikularmente, ida be sei iha baze ekonómika nasionalmente konstituída, labele dispensa, pelu menus iha prazu médiu, utilizasaun mekanizmus públikus ne'ebé Estadu fornese tiha ona (oferese hela) ba prosesu inkorporasaun direitus partikulares sira nian – *kona-ba propriedade no kapitál*- ho título ne'ebé Estadu rekoñese nia idoneidade atu publiku bele fiar. Estrutura propriedade ne'ebé la komesa kedas define, sei kria inérsia ekonómika, partikularmente ba investimentu privadu, i ho kustus hirak ne'e, ne'ebé kalkula ho riskus no inserteza la hatene see lós mak bele ou la bele sai titulár. País labele hein, tan de'it indefinisaun ba Estatutu propriedade, no mós kona-ba tranzasoens. Tanba razaun ida ne'e, alein de laiha lejislasaun, Governu sei aposta atu revitaliza Konservatórias – *ne'ebé nia maka tutela prosesus rejistu tranzaksoens* no servisus Notariadu.

4. Komunikasaun Sosiál

Ami defende katak valór inalienável kona-ba Direitu ba informasaun bazeia ba pilares liberdade no sidadania.

Komunikasaun Sosiál ida ke livre, independente no pluralista, bele sai hanesan meu extraordináriu ho espíritu krítiku ne'ebé salutar iha ita nia sosiedade, no mós hanesan fatór karakterizadór ba Estadu Demokrátiku, tanba nia papél rasik, ba sidadauns hotu, ba sira nia direitu fundamentál kona-ba livre expresaun du pensamentu no ba kriaun, i direitu atu informa no simu informasaun.

IV Governu Konstitusionál nia preokupasaun maka afirmasaun ba Komunikasaun sosiál hanesan instrumentu atu dezenvolve asoens edukasaun sívika no promosaun sidadania, hodi buka kontribui atu ema bele komprende prosesu polítiku nasional.

Ami insentiva (enkoraja) relasaun direta Servisu Públiku Rádiu no Televizaun nian ho órgauns komunikasaun sosiál sira seluk ho valores kultura no identidade Povu Timór-Leste i naturalmente, ho valóres intrínsekus (relasiona lós) ho demokrasia no konvivênsia demokrátika, hodi respeita ema nia dignidade no pluralizmu (barak no oioin) opiniaun.

Nune'e setór importante ida ne'e, iha ita nia sosiedade, sei hetan kondisoens atu dezenvolve massa krítika no responsável, hodi presta kontributu importante ba ezistênsia comunidade nasional ida ne'ebé bele hetan informasaun barak liután, ho iha respeitu ba pluralizmu sosiál, tolerante no inkluziva.

Ne'e maka prezisa hatama ona reformas substansiais iha sektór ida ne'e, atu evita manipulasaun, sensura, auzênsia de kontraditóriu no responsabiliza rasik see maka informa no see maka simu informasaun.

Entaun prinsípiu esensial maka atu asegura ba Órgauns Komunikasaun Sosiál no ba sira nia profissionais ambiente indispensável ba liberdade, izensaun no independênsia bazeia ba qualidade, profesionalizmu, responsabilidade no rigór.

Governu defende no apoia lójika atu defende maka'as direitu ba livre expresaun no kirasaun, hodi promove liberdade imprensa, iha kontektu liberdade no independênsia ba meius komunikasaun sosiál hotu, relasiona ho poderes polítiku no ekonómiku, hodi nune'e bele viabiliza konfrontu normal entre korrentes opiniaun oioin ne'ebé pluralizmu sosiál ho sosiedade demokrátika lejimiza ona.

IV Governu Konstitusionál sei iha hanesan prioriedade uluk liu nian maka enkuadra (hatama) legalmente atividade empresas komunikasaun sosiál no sira nia ajentes oioin: jornalistas, foto-jornalista, operadores kâmara no téknikus sira seluk.

Kona-ba Rádiu no Televizaun Timór-Leste – RTTL – Governu sei atua atu kria Estatutu empreza tanba regulamentu agora ne'e nian, UNTAET mak halo iha tinan 2000, RTTL sei uza hela maibé la tuir ona realidade empreza no realidade Paíz nian.

Estatutu foun sei kontempla kontratu konsesaun servisu públiku entre Estadu ho RTTL, atu Empreza bele hala'o servisu ida ho qualidade i referênsia, hala'o nia papél kona-ba haklaken Kultura no respeita preferênsia audiênsias oioin.

Governu sei insentiva redimensionamentu ba atuais órgauns diretivos, kuadrus no servisu RTTL, ne'ebé permite ba operadór públiku radiu ho televizaun atu halo servisu modernu, haree hosi qualidade produsus.

Governu apoia interkâmbiu internasionál no ko-produsaun televiziva ho Países belun sira no mos ho CPLP.

Governu sei insentiva dezenvolvimentu konteúdu ba televizaun, atu televizaun nasional promove sidadania no formasaun ba Timór-oan tomak liu hosi programas televizivus temátikus hanesan : saúde, edukasaun, kultura, istória nst.

Nune'e mós Governu sei lejisla atividade televizaun ho rádiu, pública ka privada, hanoin ona kona-ba televizaun privada, tuir radiu ne'ebé iha ona.

Lejislasaun ida ke enkuadra atividade rádiu sei fó atensaun partikulár ba rádiu privada, bele rádius kominitárias, regionais ou iha tempu badak nasionais, kona-ba konteúdu no obrigasoens perante Estadu no sidadaun sira hotu.

IV Governu Konstitusionál sei kria mós Lei Imprensa tuir ezijênsias modernidade nian no hosi sociedade informasaun, halo tuir tomak Konstituisaun i bele enkuadra kria saun no atividade hanesan Ajênsia Notícias Timór-Leste nian.

Pakote lejislativu referente ba komunikasaun sosiál sei fó mós atensaun atu kria entidade reguladora ida ba sektór ida ne'e, bele hosi empresas komunikasaun sosiál, bele hosi jornalistas sira, hodi prevê, kona-ba profesionais komunikasaun sosiál, produsaun lejislativa ida ke enkuadra nia atividade.

Governu insentiva dignifikasaun no estabilidade karreira profesionais sira hosi komunikasaun sosiál, haree kona-ba regulamentu Karreira Profisionál Jornalista nian no karreira profisionál, nune'e mós kria Kódigu Deontolójiku, hodi hala'o konsulta ho interesadus sira.

Embora foin hahú, Governu se estimula kona-ba étika no disiplina iha merkadu publicitáriu, hodi kria lejislasaun ketak ida atu promove adopsaun Kódigu deontolójiku ida atu valoriza atividade ne'e.

Kapítulu VII

Defeza Nasionál no Polítika Externa

1. Defeza Nasionál

Tanba tuir Konstituisaun atividade ida ne'e laós responsabilidade eskluziva Governu nian, ne'ebé defeza integridade territóriu nasionál representa dezígniu esensíal atu hetan liberdade no bein-estar ba populasaun, hodi garante estabilidade no desenvolvimentu Paíz, i Defeza Nasionál hanesan pilár fundamentál ba konstrusaun no viabilizasaun Timor-Leste.

Iha nia sentidu luan liu, finalidade ida ne'e, ne'ebé prezide prinsípiu ba possibilidade supresaun ba independênsia, ezije, tuir kontektu estratéjia integrál Estadu nian, hamutuk ho asoens estruturais, mak manutensaun Forsas armadas no Forsas Seguransa, atu garante independênsia nasionál no integridade territoriál, tuir orden konstitusionál, ho meus rasik ou bele tama iha alianças eventuais ruma, iha kaudru intereses nasionais no boa viziñansa.

Estadu tenke halo esforsu no fó atensaun spesiál, la'ós de'it kona-ba adopsaun desizoens polítikas estruturantes, relasiona ho enkuadramentu jurídiku no definisoens

konseptuais, maibé ba konkretizasaun kestoens téknikas no operasionais, ho karáter institusionál, atu atinje objetivus totais Nasaun nian.

Kona-ba Defeza Nasionál – ho objetivus maka Opsoens Boot ba Dezenvolvimentu – Governu sei implementa desizoens polítikas estruturantes hanesan:

- Defina hanesan prioridade sektór defeza iha perspetiva integrada ho orientasaun-baze kontinentál no marítima;
- Defina Polítika Defeza Nasionál no nia enkuadramentu lejislativu no konseptuál, ho empenhu husi órgauns kompetentes Estadu nian;
- Defina programa efisiente ba formasaun no treinu ba elementus Forsas Armada nian tomak tuir sira nia kompetênsias;
- Halo revizaun ba lejislasaun hanesan Lei Orgânica F-FDTL nian no regulamentus sira seluk;
- Defina programa efisiente atu ekipa Forsas Armadas ho rekursus materiais esensiais atu hala’o sira nia knaar, inklui loke kantinas ho izensaun taxa no partisipasaun subsídus hosi Estadu, hahú iha Dili, Baucau ho Maliana.

Hamutuk ho Konseitu Estratéjiku Defeza no Seguransa Nasionál, Governu sei haree Lei kona-ba Defeza Nasionál i Forsas Armadas, ne’ebé sei karateriza halo di’ak *Misoens Jenérikas* F-FDTL nian i sei regula halo di’ak iha nia *Misoens Espesífikas*, atu nune’e bele dezeña estrutura ida ho estabelese metodolojia ida hodi define *Sistema Forsa Nasionál* no nia *Dispozitivu*, nune’e mós ho meius umanus no materiais ne’ebé prezisa atu hala’o sira nia misoens: Governu tenke kria infra-estruturas ne’ebé prezisa ba bases militares, ne’ebé sei define.

Konsidera nudar evidênsia katak Forsas Defeza - - hanesan iha Países sira seluk, ne’ebé Timór-Leste la’ós exepasaun ida – maka aleinde misoens espesífikas, bele mós husu sira atu hala’o *misoens ba Interesse públiku*. Verdade ida ne’e prezisa daudaun ona atu institusionaliza.

Vertente seluk, i importante hotu, maka atu hala’o kompromisus internasionais ne’ebé bele akontese tuir kontektu polítiku mundiál no rejionál. Transformasoens iha sistema polítiku internasionál, iha implikasoens ba postura no misoens ne’ebé sei fó ba Forsas Defeza, hodi obriga halo reformas kle’an no haluan sira nia kampu atuasaun.

Realidade hatudu katak Forsas Defeza sira (iha rai seluk) organiza ona hanesan forsas konjuntas no kombinadas, hodi kaer ba mandatus mai hosi organizasoens internasionai, atu hala’o – sai hosi fronteiras nasionais – ne’e maka ita bolu naran *Novas Misoens*, hanesan “*jestaun ba Krizes*”, “*apoiu ba manutensaun paz*”, “*umanitárias*” no “*kooperasaun*”.

Misoens hanesan ne’e sei obriga halo ajustamentu ba programas formasaun no reequipamentu ba Forsas Defeza, i bele dehan, opiniaun pública mós simu, ne’ebé fó kbiit ba Governu atu hola inisiativas hodi alkansa objetivus polítika externa.

Governu propoen atu nomeia Xefe du Estadu Maior F-FDTL nian, tuir termus ne'ebé define ona iha Lei, hodi atribui nia kompetênsias legais atu nia bele halo elaborasaun kona-ba Planeamentu Forsa ba nia kriasaun, formasaun/treinu no sustentasaun rasik, hodi nune'e nia knaar hetan dimensaun foun ida ne'ebé operasionál tebes, i bele nune'e alkansa padraun efikásia hodi kumpri knaar no responsabilidades ne'ebé nia simu, iha âmbito nasional no internasionál;

Governu propoen atu, kona-ba remunerasaun, *Chefe de Estado-Maior General das Forças Armadas hetan nível ho Ministru, i Chefe de Estado-Maior das Forsas Armadas nível ho Sekretáriu de Estado.*

Governu sei defini polítika ofisial ida kona-ba sosa kilat, atu evita tama fali iha redes tráfégu ilegál, i no mínimu tenke garante transparênsia iha sektór ida ne'e.

Durante Lejislatura ida ne'e Governu sei enkoraja atu halo korresaun ba lakunas fundamentais ne'ebé molda/forma karáter institusionál Forsas Defeza, hahú hosi rekrutamentu mansebus foun to'o ba iha kondisoens militares antigos sira.

2.Negósius estranjeirus

Diplomasia ne'ebé Timór-Leste tenke dezenvolve maka oinsá bele responde ba realidade internasionál iha milénio foun ida ne'e no ba imperativus internus, hodi valoriza kondisoens favoráveis ne'ebé iha atu hamrik iha Rejiaun no Mundu.

Desde hahú ita nia existênsia hanesan Estadu soberanu, ita kuda ona polítika amizade no kooperasaun ho Países barak i, espesial liu ho sira ne'ebé hakbesik liu ita, haree hosi termus fízikus no istórikus, hanesan Austrália, Indonézia ho Portugal.

Haree ba insersaun jeográfika no pasadu Istóriku, evalusaun ekonomia Timór sei liga liu ba evolusaun no influênsia polítika hosi Países iha rejiaun ne'e, tanba Timór-Leste lokalizadu iha rejiaun ida ke hetan influênsia boot hosi kontinente rua.

Iha kontextu ne'e Governu sei kontinua ho prosesu adezaun ba ASEAN i sei mantein mós nia partisipasaun iha Forum Ilhas Pasífiku no ACP, hodi buka alarga oportunidades halo kooperasaun, liuliu ekonómika, ba povu Timór-Leste nia di'ak.

Sei la haluha mós relasoens ne'ebé sei halo ho países seluk iha mundu ne'ebé kontribui barak tebes ba restruturasaun fízika no materiál Timór-Leste, no ba konsolidasaun demokrasia. Kontribuisaun ne'e halo ho formas oioin,ho apoiu finansiál no institusionál no dezenvolvimentu ba projetus konkretus iha rai timór, ne'ebé Governu ida ne'e sei promove aproximasaun atu reforsa relasionamentu ho jigantes balu iha globu ne'e, hanesan Xina, Japaun, Estadus Unidus América; ho mós países seluk ne'ebé hatudu ona sira nia laran luak ba Timór-Leste hanesan Cuba, Brazil, Koreaia, Malázia, Filipinas, Nova Zelândia, Noruega, Irlândia, Reinu Unidu no Komisaun Europa rasik.

Governu sei kontribui atu konsolida lasus solidariedade, amizade, no kooperasaun entre Países integrantes iha CPLP ne'ebé ho Língua Portugeza, iha expresaun universalizmu ne'ebé favorese ita nia relasionamentu ho Áfrika, Amérika no Europa.

IV Governu Konstitusionál sei reforsa lasus amizade hirak ne'e no promove kooperasaun ho Governus hosi Países hirak ne'e, atu insentiva polítikas kooperasaun ho Países hotu-hotu iha mundu no kaer ba prinsípius respeita malu, la interfere asuntus internus Estadu ida-idak nian.

Nesiedade atu estabelese ekilíbriu entre atuasaun séria, responsável, ativa no útil iha comunidade internasionál nia leet, no hili alvus prioritáriu ba atensaun ne'e, buat todan ida ba Países kiik hanesan Timór-Leste.

Nesiedade ida ne'e tenke kaer nafatin hanesan elementu xave ba definisaun kobertura diplomátika Timór nian.

Governu sei orienta nia política externa (li'ur) hodi hametin nia rede diplomátika no konsulár atuál, alarga (habelar) ba interese Estadu Timór-Leste nian no hakle'an nia prezensa iha espasus estratéjikus importantes – polítikus no ekonómikus, rejionais no kulturais – hanesan ASEAN, CPLP no Uniaun Europeia. Nesiedade ida ne'e tenke kaer nafatin hanesan elementu xave ba definisaun kobertura diplomátika Timór nian.

IV Governu Konstitusionál sei orienta nia atuasaun ba espasus ekonómikus promisoires relaciona ho ajuda pública, investimentu externu no formasaun rekursus umanus, nune'e mós ba zonas mundu ne'ebé dinamizmu ekonómiku boot tebes.

Relasoens espesiais ne'ebé kria daudaun ona, durante tinan lima hanesan Estadu soberanu, ho Países diferentes hosi kontinentes hotu, sei ezije atensaun boot hosi diplomasia timorense, ho objetivu bele aprofunda no konsolida tan kooperasaun ho parseirus tradisionais i buka tan parseirus foun.

4. Kooperasaun Internasionál

Timór-Leste tenke prepara-an atu enfrenta modelu kooperasaun internasion'al foun, rezultante hosi esforsu atu reduz ajuda pública ba desenvolvimentu. Modelus tradisionais ba kooperasaun atu fó fali fatin ba parserias foun ne'ebé hakarak halo promosaun ne'ebé fó vantajen ekonómikas ba parte rua hotu, ba Países reseptores ho Países Doadores.

Imajen ne'ebé Timór-Leste hatudu ba mundu sei hanesan faktór determinate kait ho kooperasoens ne'ebé sei mobiliza.

Promosaun rikeza kulturál, rezultante hosi diversidade povu timorense, sei kontribui atu reforsa identidade Timór-Leste iha rejiaun ne'ebé ita hela, ein partikulár, no mundu ein jerál, hodi loke janela simpatia no solidariedades internasionais.

Governu empenhadu atu promove kultura paz, diálogu no rekonsiliaun nasionál hodi kria imajen di'ak kona ba boa jestaun no aplikasaun korreta ba rekursus, relasiona ho respeitu ba Estadu de Direitu i ba garantia independênsia tribunais sira – hanesan instrumentus vitais ba konsolidasaun ita nia joven demokrasia – konsiente katak objetivus hirak ne'e maka parseirus kooperasaun sira sei la haluha wainhira apoia Timór-leste.

Suporte espesiál mai hosi organizaun ida ne'ebé halibur Países barak, hosi comunidade internasional, maka Organizaun Nasoens Unidas, i fundamentál tebes ba konsolidasaun Timor-Leste. Organizaun ida ke nunca haluha kauza Timorensen, desde 1999 maka prezente iha ne'e. Hahú hosi ne'ebá maka nunca mais haluka defende ita nia kauza, liu hosi apoiu espesífikus tuir nesidades. Governu ida ne'e sei kontinua ho nia prezensa ativa iha Nasoens Unidas atu fomenta kooperasaun multilateral ho ajênsias oioin iha Sistema Nasoens Unidas.

Nune'e mós ho ajênsias Kooperasaun bilaterál, tanba relasoens internacionais ne'ebé di'ak, sira mós fó apoiu konkretu atu hatán ba nesidades reais povu timorensen, liu hosi projetus no ho apoiu morál i demonstrasoens da amizade no fraternidade. Governu ida ne'e kompromete atu fomenta parserias foun ba desenvolvimento Timór-Leste no halo esforsu hotu, atu tuir nia possibilidades selu fali favór, hodi partisipa ba desenvolvimentu Países seluk.

Sei estimula nafatin atusaun hosi organizasoens naun-governamentais internacionais ne'ebé iha papél krusiál iha ita nia Paíz, liuliu sira ne'ebé fó asistênsias bázikas ba populusaun.